

Korinti a zengât ekap kânok Pauloñâ kulemgum zingip.

Mâsop den.

¹⁻² Anutugât sâtkât Yesu Kristogât Aposolo a Paulo, nâ sot bukuniñâ Sostene, net Korinti kamânân Anutugât kâmut ândie, zengât ekap zi kulemgum pet. Yesu Kristoñâ gâsuzingâm zâkkât singi hâlâlu ândibigât sâip. Yatâ otzingi kamân dâp Yesugât kâmut, zen Kembu Yesugât kutñâ konsâm mâpâsem ândime, zen sot kânok urâwe.

³ Ibâniñâ Anutu sot Kembu Yesu Kristo, zekâren gâbâ um lumbe sot tânzângoizângoñ zengâren zimbap.

Korinti zengâren den singi âlipñâ muyagem zeip.

⁴ Zen Yesu Kristo sot pâlâtâñ utne Anutu zâk tânzângoip. Zorat op ko narâk dâp nâ zengât op Anutu sâiwap sâm dukuman.

⁵ Zen Kristo sot pâlâtâñ utne singi âlip sâsâñâ sot nângânâñgâ topñâ topñâ zingâm nañgip.

⁶ Zingâmñâ Kristogât sâm âsak denñâ umziñan ândâñâ gâsuiip.

⁷ Oi Kaapumñâ imbañâ zingip nep top top tu-ume. Zen Kembuniñ Yesu Kristo âburem gâbapkât um bâbâlañ op mambât ândime.

⁸ Zâkñâ Kembuniñâ Yesu Kristo gâbabân mâteñan tosaziñ buñ hâlâlu kinbigât mem kâtikñan kwatziñgi ândinetâ narâkziñ âkâbap.

9 Anutu zâk nanᵇâ Kembuniᵇâ Yesu Kristo, zâkkâren târokwapigât diizingipᵇâ dumnâ den ᵇâi mân sâbap.

Korinti a, ziᵇâ kâsâpagowe.

10 Bukurâpnâ, nâ Kembuniᵇâ Yesu Kristo kutᵇangât op girem den sa nâᵇgânek. Zen den top top sâmᵇâ mân kâsâpagobi. Kâsâpagom kâmut zagât upi, zo buᵇâ. Um nâᵇgânâᵇgâziᵇ mâpotne kânok oi ândibi.

11 Bukurâpnâ, osetziᵇan den kâsâp muyagem ziap. Koloï zâkkât arâᵇᵇâ, zeᵇgâren gâbâ nâmbutᵇâ ziᵇ yatâ sâne nâᵇgâwan.

12 Den itâgât san. Zeᵇgâren gâbâ ᵇâiᵇâ itâ sâmap, “Nâ Paulogât a.” Oi ᵇâiᵇâ sâmap, “Nâ Apologât a.” Oi ᵇâiᵇâ sâmap, “Na Peterogât a.” Oi ᵇâiᵇâ sâmap, “Nâ Kristogât a.”

13 Bâi, dap dap? Kristo pâuksâip mo dap? Paulo nâᵇâ zeᵇgât op poru nagân muwan? Mo Paulo nâgât korân too saᵇgonziᵇgâwe?

14 Kabik ninak too mân saᵇgonziᵇgâwan. Krispo sot Gaio zerâk too saᵇgonzikâwan.

15 Zen itâ sâbegât, “Zâkkât kutᵇandâ lonᵇiᵇniᵇgi too saᵇgonniᵇgâwe.” Yatâ buᵇâ. Yatâ mân nâᵇgâbi.

16 Zi ᵇâi nâᵇga. Setepano arâᵇᵇâ too saᵇgonziᵇgâwan. Nâmbutᵇâ ko mân nâᵇgan.

17 Kristoᵇâ a too saᵇgonziᵇgâbatkât mân sâm nigip. Den siᵇgi âlipᵇâ dâzâᵇgom ândibatkat sâm nigip. Oi Yesu poru nagân moip, zorat den imbanâ buᵇ opapkât a nâmbutᵇâ den kelâkᵇoorâk sâme yatâ sâm kubikᵇâ mân sâman. Nâ siᵇgi âlip den zo bonᵇik sâman.

A um kâtik zinj Yesugât den sinji nângâne yen opmap.

18 A tâmbetagoagonjângât mâtâbân ândie, zen Yesu poru nagân moip, zorat nângâne yen opmap. Oi nen kubikkubik mâtâp ândimenjâ ko nângindâ Anutugâren gâbâ imbanjânootjâ opmap. Sinji âlip, zo sâm kubik mân sâman.

19 Zorat Kembugât ekabân den nâi itâ ziap, “Kembujâ itâ sap, ‘Nâjâ sa a nângânângâziñoot zen kwakpi. Nângânângâziñoot, zengât nângânângâ zo doonjubat.’ ”

20 Zen dap nânge? A nângânângâñoot, zo ikâ? A nâi den nângâm simbitkum sâmap, zo ikâ? A narâk zirat topjâ nângâmap, zo ikâ? Nâ sa nângânek. Anutujâ hân a zengât nângânângâziñ egi yenjâ oip.

21 A zen ziiñâ nângânângâyân Anutugât topjâ iknam kwagawe. Wangât, zen yatâ upigât Anutujâ kânjan nângâm kubigi zeip, zorat. Den sinji âlipjâ dâzângomen. Um kâtik a, zen zorat nângâne yen opmap. Ka Aposolo a, nen den zorat nângindâ bon opmap. Oi nen den sinji zo sâindâ a nâmbutjâ zinjâ nângâm Kembugât sinji upme. Zo Anutujâ kânjan nângi zeipkât yatâ âsagemap.

22 Yuda a um kâtik ândime, zen kulem top top iknam sâme. Grik a, zen ko hân a zengât nângânângâ den zo nângânam kâtigime.

23 Nen ko Yesu poru nagân kuwe, zorat den sâindâ Yuda a zinj nângâne kwakmak opmap. Oi Grik a sot hân nâin gokjâ, zinjâ den zo nângâne den yenjâ opmap.

24 Ka a nâmbutnâ Kembunâ gâsuningip, Yuda a sot hân nâin gok ârândân, nen Kristogât nângâm itâ sâmen, “Anutugât imbanâ sot nângânângânâ zemnângap.”

25 Um kâtik a, zen Anutugât nângânângâ den nângâne yen opmap. Ka Anutugât nângânângâ, zorân a zenngât nângânângâ wâlap. Oi a zen Anutugât den nângâne lolot uap. Ka Anutugât den, zorânâ ko a zenngât imbanâ wâlap.

*A zâizâin zinjâ ko bituk, a giginâ zinjâ ko donbep
Kembugât sinji upme.*

26 Bukurâpnâ, A ikâ zorân Anutunâ diiningip? Zo ek nângâne. Osetniñan a nângânângâzin patâ donbep bunâ. A kutâ donbep bunâ.

27 A mâteziñan a giginâ ândimen, nen Anutunâ diiningâm a nângânângâziñoot zo añun kwatziñgâmap. A um kâtik ândime, zen nângânângâziñangât nângâne añun upapkât yatâ oip. A zenngât mâteziñan a giginâ sot lolot ândimen, nen Anutunâ diiningâmñâ a imbanâziñoot añun kwatziñgâmap.

28 A mâteziñan bâbâ lolot ândimen sot a yennâ ândimen, nen Anutunâ diiningâmmap. Oi a zâizâin upme, zenngât imbanâzin koi yen upme.

29 Zo hân a nen Anutugât mâteñan sâk mâme upemgât yatâ opmap.

30 Korinti a zen Yesu Kristo sot pâlâtân ut-netâ Anutunâ ândiândi unaknâ zingip. Anutunâ kembuniñâ Yesu Kristo kwânângip, zo nenngât nângânângâ sot tosanin gulipkukun a sot um salek muyageniñgâniñgân sot nenngât suupniñâ mimiñâ a kwânângip.

³¹ Zorat Kembugât ekabân den kulem n̄ai itâ ziap,
 “Nâi zâk sâtâre den sâbâ sâm Kembuñâ oip, zorat sâbap.”

2

Paulo zâk sâm kubikkubik den mân sâmâip.

¹ Bukurâpnâ, nâ zengâren gamñâ Anutugât den sapsun dâzângowan. Zo sâm kubikkubik den sot a zengât nângânângâ den mân dâzângowan.

² Nâ itâ nângâm kâtigem zengâren gâwan. Yesu Kristo poru nagân kuwe, zâkkât denâk sapsun zingâbat.

³ Oi nâ zen sot tap imbanjâ buñ, kengât op ândiwan.

⁴ Oi sinji âlip sâsân, zo nângânângâ pâtâ sâm kubikñâ mân sâwan. Buñâ. Kaapumñâ tânnogi sinji âlip sa imbanjâ muyagezingi igâwe.

⁵ Den sâwan, zo a zengât nângânângâ patâ den yatâ buñâ. Zen a zengât nângânângâ den zorat nângâne bon opapkât yatâ orâwan. Anutugât imbanjâ zengâren muyagei ekñâ nângâne bon upapkât yatâ orâwan. Zen Kembugâren nângâm pâlâtân kwâkñangâbigât yatâ orâwen.

Anutunjâ nângânângâ bonjâ niñgâmap.

⁶ A Anutunjâ kubikzingi nângânângâziñoot ândime, zen Kembugât nângânângâ den bonjâ dâzângomen. Ka den dâzângomen, zo um kâtik a zengât mo hân a kutâ zengât nângânângâ yenñâ buñâ. Hângât a kutâ nângânângâziñangât bonjâ mân muyagem mârum buñ utname.

⁷ Nen ko den Anutugât nângânângâyân tik zem gâip, zo sâmbemgât sinji neule âsaknâ minatkât Anutuñâ mâruman, hân mân muyageibân den zo sâmbâtân oip.

⁸ Hân a kutâ, zen aksik den zo mân nângâwe. Zen den zo nângâm sâi ko Kembu, âsaknâ mariñâ poruyân mân kumbe.

⁹ Zorat Kembangât ekabân den nâi itâ kulemgune ziap,

“Anutu umziñandâ gâsume, zengât sinji Anutuñâ kut nâi nâi kubigip. Kut nâi nâi zo a senñâ mân igiknâ sot kindapnâ mân nângânângân sot a umziñan zo mân nângâwe.”

A Kaapum sot ândim sinji âlip nângâne bon upap.

¹⁰ Nen ko Anutuñâ sâi Kaapumñâ den Anutugât umñan ziap, zo sapsun niñgip. Kaapum zâk den Anutugât umñan tik zemap, zo aksik nângâmap.

¹¹ A nâiñâ bukunangât nângânângâ zo dap yatin nângâbap? Um mariñandik zo nângâbap. Zo yatik a nâiñâ Anutugât nângânângâ zo mân nângâmap. Anutugât Kaapumñâ ziknik zo nângâmap.

¹² Oi Kaapum miwen, zo hânân gâbâ bunâ. Anutu, zikñan gâbâ Kaapum zo miwen. Anutuñâ kut nâi nâi nengât sinji sâip, zo nângânatkât Kaapumñâ niñgip.

¹³ Anutuñâ Kaapumñâ niñgip. Zorat den Anutugât umñan ziap, zo sâmen. Zo a zengât nângânângâyân mân sâmen. Bunâ. Kaapumñâ

den umniḡan p̄ai s̄amen. Kaapumḡa den umniḡan p̄ai s̄ainḡa Kaapum sot āndime, zen dinniḡa zo n̄aḡāme.

¹⁴ Ka a um k̄atik āndime, Kaapumziḡ buḡ āndime, zen Kaapumḡat den sot imbanḡa, zo umziḡan m̄an mem āndie. A yatā zo, ziḡ den zorat n̄aḡāne yen opmap. Zen dap yatā n̄aḡābe? Den zo Kaapumziḡoot ziḡjik n̄aḡāme.

¹⁵ A Kaapum sot āndime, zen kut ḡai ḡai zorat topḡa n̄aḡām s̄al̄apkume. Oi a Kaapumziḡa buḡ āndime, zen kut ḡai ḡai zorat topḡa sot a Kaapum sot āndimen, neḡḡat topḡa m̄an n̄aḡāme.

¹⁶ Kembuḡat ekab̄an den ḡai it̄a ziap,
 “Kembuḡat umḡan den ziap, zo ḡaiḡa n̄aḡipḡa
 ālip den ḡai dukubap? Yatā Buḡa.”

Nen ko Kaapumḡa Kristoḡat n̄aḡān̄aḡa den zo niḡi mem āndimen. Mem āndimḡa kut ḡai ḡai zorat topḡa n̄aḡām kubikmen.

3

Korinti a ziḡ siḡi ālib̄an katep zeḡḡat holi yatā op āndiwe.

¹ Bukur̄apn̄a, n̄a zeḡḡaren gam a kaapumziḡoot, zo dab̄angen d̄az̄aḡobam? A kaapumziḡ buḡ, zo d̄az̄aḡobam. Zen siḡi ālib̄an katep m̄aik yatā āndie

² Katep m̄aik zen nalem k̄atik m̄an nem nam̄ak nime. Zen nalem k̄atik dap op nimbe? Oi nar̄ak ziren Korinti a zen katep m̄aik yatā siḡi ālipk̄at nalem k̄atik nimbiḡat d̄ap m̄an ue.

³ Zen um kâtik. A kaapumziñ buñâ yatâ op ândie. Zengâren den sârek sot kâsâp sot um kâlak muyagei a kaapumziñ buñâ yatâ op ândie.

⁴ Zen itâ sâme, “Nâ Paulogât a.” Nâmbutñâ ziñ sâme, “Nâ Apologât a.” A yatâ sâme, zen um sânjiñanğât mâtâbân ândime.

⁵ Apolo, zâk ñâi? Paulo, nâ ñâi? Net kore añâ Kembugât den dâzânğoitâ nânğâm pâlâtân kwâkñanğawe. Kembuñâ nep diñ sâm nikip yatigâk tuuwet.

⁶ Den sumbuñâ ñâi sa nânğânek. Nâ nep kârâm kâmirâwan. Apolo zâk nep galem op hibuk pitip. Kembuñâ ko mäsop mei bonñâ muyageip.

⁷ Kârâm kâmirâwan sot hibuk pitip, nekât bonñâ mân sâbi. Mäsop mei bonñâ muyagemap, Anutu, zâkkârâk sâbi.

⁸ Kârâm kâmirâwan sot hibuk pitâmap, nepnik kânok. Oi zorat sânğânñâ mia zâk yatik mimbap.

⁹ Net Anutugât berân mâme a. Zen ko Anutugât sin kâlam yatâ. Zen Anutugât namâ.

Kârâpñâ nepkât topñâ sâm muyagibap.

¹⁰ Zen Anutugât namâ yatâ oi Anutuñâ nep sâm nigip dâp nâ mirâ tuutuun a op kunkun kâtik pa giarip. Oi a nâmbutñâ ziñ kunkun kwâkñan târokwap tuume. A yatâ zorân nânğâmñik tuubi.

¹¹ Kunkun giarip, kinzap, zorat kutñâ Yesu Kristo. Zo sâmbum pam ñâi pâi geibap, zorat dâp mân taap.

¹² Oi kunkun zorat kwâkñan a ñâiñâ goide kât mo siliwa mo kât ñâi âlipñâ, sânğân patâ mo nak, ogep mo um târokwap tuubap zo ko mirâ tuutuunñâ zorat topñâ muyagibap.

13 Narâk patin zorat topnâ muyagibap. Narâk zoren kârâp patâ âbângum simbap. Oi kârâp zorân sem nep zikņik zikņik tuuwe, zorat top sâm muyagibap.

14 Kârâpnâ a nâigât nep tuutuun zo mân sei sângân mimbap.

15 Ka a nâigât nep tuutuun, zo kârâpnâ sei sângân buņ upap. Oi zikņâ ko mân tâmbetkubap. Kârâbân gâbâ mâkâm gâbap yatâ upap.

A mân sâm âlip kwatziņgâbi.

16 Nen Anutugât tirik namâ. Anutugât Kaa-pumņâ umniņan tâtat mâme opmap. Zo nânge mo buņâ?

17 A nâi, zâk Anutugât namâ kiom tuubap zo ko Anutuņâ a zo yatik kiom miņanğâbap. Anutugât tirik namâ, zo hâlâlu sâsân. Oi namâ zo, zen.

18 Zen umziņ mân kâitkubi. Zeņgâren gâbâ nâi zâk hân a zeņgât nânğânânğâ zorat nânği zâibapkât op girem uan. A zo yatâ, zorân nânğânânğâ zo birâm hân a mâteziņan kwakmak yatâ oi âlip upap. Zâk nânğânânğâ yennâ zo biri Anutuņâ zâkkât nânği nânğânânğâ bonņoot upap.

19 Hân a zeņgât nânğânânğâ zorat Anutuņâ nânği bon buņ opmap. Kembangât ekabân den kulem nâi itâ ziap,

“A nânğânânğâziņanğât nânğâne zâizâiņ opmap, zen Anutugât arâpnâ kâitzânğonam orot mâme upme. Ka Anutuņâ topziņ nânği bâliņ oi kâbakņeziņğâmap.”

20 Oi den nâi itâ ziap;

“Kembu zâk a nânğânânğâziņ patâ zeņgât den nânği yen, bon buņ opmap.”

²¹ Zorat zen hân a nenġât nânġânânġâ mo imbanġâ zorat nânġâm um zâizâiņ mân upi. Nâ Paulogât a mo nâ Peterogât a sâme, zen ziņanġât nânġâne zâizâiņ oi yatâ mân upi. Zi den zorat torenġâ sa nânġâneġ. Kut nâi nâi aksik zo zenġât siņġi.

²² Paulo sot Apolo, Petero, nen zenġât siņġi. Oi hânân kut nâi nâi mumuņâ sot ândiândiņâ, zo zenġât siņġi. Itârâņ ziap sot gâtâm muyagibap aksik, zo zenġât siņġi.

²³ Zen ko Kristogât siņġi ândie. Oi Kristo zâk Anutugât siņġi. Zorat zen Kristo sot Kembugât siņġi ândie, zorarâk sâtâre upi. A zenġât nânġâne zâizâiņ mân upap.

4

Kembuņâ nep a zenġât topziņ sâm muyagibap.

¹ Zen nenġât itâ nânġâbi. Kristogât nep a sot Anutugât den tik zem gâip, zorat galem a.

² Oi galem a nen dâņ galem op ândinatġât sâsâņ. Zorat op ko yatâ op ândeindâ dâp upap.

³ Oi zi ninanġât sâbâ. A minduminduyân nâiņâ nânġât den sâme oi ko zorat nânġa yenġâ opmap. Oi ninak topnâ âlip mân sâman.

⁴ Nâ ninanġât nânġâm tosanâ mân nânġan, zorat nâ tosanâ buņ ândian mân sâbat. Topnâ sâbap, zo Kembu kânokġâ ândiap. Zâkġâ tosa ek nânġâmap.

⁵ Zen ko ayâk, zorat topnâ muyagibigât kek mân sâbi. Kembu zikġak gamġâ kut nâi nâi tik ziap, zo mem kâkġan pâmabap. Oi umniņan kut nâi nâi tik ziap, zo aksik âsagem nanġâbap. Oi Anutuņâ a

aksik holizinj ekmap, zâknâ a zingiri holizinj âlip oi ko sârn âlip kwatzingâbap.

Korinti a zen zâizâinj urâwe.

⁶ Bukurâpnâ, zen Kembugât den mân walâbi. Zinjâ hân a nen mem zâi kwap, mem gei kwap mân otninjabi. Zâizâinj man upi. Nâ den san, zo Apolo sot nâ, niiknjan kwap san. Zen nekât topnik ek nângâm kwâkâbigât san. Net Anutugât berân mâme ayâk.

⁷ Zâizâinj upme, zengât sâbâ. Gâ a nâinjâ a patâ upan sârn, sârn gigip? Nângânângâ den zemgigap, zo gikak muyagein mo nâinjâ mem gigip?

⁸ Nâinjâ gigip oi ko wangât gikâ sâkkâ mem zâi pâmat? Zen zâizâinj op ziiñangât itâ nângâme? “Ungât gom sambe nenngâren piksâm ziap. Nen mârurn sikumniñoot urâwen.” Oi zen itâ sârn, “Nen Paulo bunâ a kutâ op ândien.” Zen topzinjâ yatâ nângâme? Perâknak, zen a kutâ op sâi ko diiniñgâne zengâren târokwap a kutâ upem. Zo yatâ âsagei sâi ko umâlep opam. Zen ziiñangât nângâne zâizâinj opmap. Ka nâ ko zâizâinj mân opman.

⁹ Aposolo nenngât itâ nângan. Aposolo a nen gigiñâ ândien. Anutunâ sâi Aposolo a nen kâmbangât sinqi yatâ op ândien. A aksik patâ, sumbem a sot hân a zengât mâteziñan a zinj nângom kut nâi nâi otniñgâne niñgitme.

¹⁰ Nen Kristogât opnâ a kwakmak yatâ urâwen. Zen ko Kristogâren târokwap nângânângâzinj patâ yatâ urâwe? Nen lolotnâ. Zen ko kâtiknâ? Um kâtik a zinj zen sârn âlip kwatziñgâme? Nen ko sârn bâlinj kwatniñgâme.

11 Nen too nalemgât mom ândiwennâ ândim gen. Hâmbâ alâknâ mem ândimen. A ziņ nâņgom moliniņgâme. Mirâ buņ ândiwennâ ândim gen.

12 Betņâ sâknam nep tuumen. A zen sâm bâliņ kwatniņgâne nen den âlipņâ dâzâņgomen. Lan otniņgânetâ nen hâuņâ mân otziņgâmen.

13 Sâm bâliņ kwatniņgânetâ nen buku orotņangât den dâzâņgomen. Nen a doņbep zeņgâren gâbâ iisak alâ gwapgwap yatâ otniņgâne ândiwennâ ândim gen.

Paulo zâk siņgi âlibân Korinti a zeņgât ibâziņ oip.

14 Zen aņun upigât den zi mân kulemgum ziņgan. Nan bârarâpņâ girem den dâzâņgobam ekap zi kulemgum ziņgan.

15 Kristogât berân mâme a kâmut zeņgâren ândie. Ka siņgi âlibân ibâ doņbep buņâ. Nâ kândom Yesu Kristogât den siņgi âlip dâzâņgom nâ kânok ibâziņ orâwan.

16 Zorat nâgât mâtâp zo lân ândibigât kindap pârõņ den dâzâņgua nâņgâne.

17 Zen nâgât mâtâp lân ândibigât Timoteo sâņgongua zeņgâren gaap. Timoteo zâk Kambu sot pâlâtâņ opņâ ninâ nannâ âlip yatâ op ândei umnâ zâkkâren kinmap. Zâk sâņgungua zeņgâren gam nâ Kristo sot pâlâtâņ op orot mâmenangât siņgi den, zorat sapsum ziņgi nâņgâbi. Yesugât kâmut kamân dâp ândie, zen nâgât mâtâp zo yatik lân ândibigât dâzâņgoman.

18 Korinti zeņgâren a nâmbutņandâ zâizâiņ op nâgât itâ sâme, "Paulo zâk mân gâbap."

¹⁹ Nâ ko Kembuñâ nângânigi narâk mân kêrep oi kek gâbat. Zengâren gamñâ a zâizâin op den sâme, zengât topzin ikpat. Dinziñâ zorat mân sâm imbanâziñangât topñâ ikpat.

²⁰ Anutugât um topñan ândiandin, zo denân mo denâk buñâ. Zo Kembugât imbanâñan kâtigem ândiandin.

²¹ Oi mâsikâziñga zen sânek. Nâ kâmbam mem gâbatkât se? Mo buku opñâ lumbenâ op gâbatkât se?

5

Korinti zengâren bâliñâ muyagem zeip.

¹ Zengât singi den itâ sâne nângâman. Zengâren lañ mâman ñâi ândiap. Oi lañ mâman bâliñâ zo a um kâtik zengâren mân muyagemap. A ñâiñâ ibânangât ambinñoot ândimap, zorat san.

² Zo yatâ muyagem zeï zen dap op zorat mân nângânangâ op tok zâizâin op ândie? Zo mân orotñâ. Zen zorat umbâlâ opñâ anâ bâliñâ oip, zo osetziñan mân tâpapkât molinetâ ari dâp upap.

³ Nâ sâknâ ko kêrebân ândian. Umnâ ko zen sot tapñâ yatâ, a bâliñâ oip zo, zâkkât den itâ sâm kwâkâwan.

⁴ Zen Kembu Yesugât korân mindunetâ umnâ zen sot tâi Kembu Yesugât imbanâñan kâtiginat.

⁵ A zo um dâpñâ kubikkubik opñâ Kembu gâbâbân âlip upapkât Satangât bikñan pâindâ um sâkñangât âkñâle bâliñâ zorân tâmbetkubap.

Kut ñâi ñâi kâlakñâ zo birâm samñâ mem ândibi.

⁶ Bâliṅâ yatâ zo osetziṅan zeî mân nâṅgânâṅgâ op zâizâiṅ utne nâṅga mân dâp uap. Zuu usiṅandâ nale mân giari une kâlak op nanṅâmap. Zo nâṅge.

⁷ Zorat kâlak zo birâm kubik pam om nimbi. Kristo zâk zeṅgât kâlakziṅâ betziṅan meip, zorat kâlak buṅ ândibi. Mârum Yuda a ziṅ Pasowa kendon tâtnam râma ṅâi kuwe. Oi zo yatik neṅgât Pasowa râma kuwe, zo Kristo.

⁸ Nen kâlak birâm tâtnatkât moip. Zorat um kâlak sot bâliṅâ zorat kâlakṅâ birâm kut ṅâi ṅâi salek sot târârakṅâ zo mem ândinat.

⁹ Nâ mârum ekap ṅâi itâ kulemgum ziṅgâwan. Zen laṅ mâman a ambân zen sot nale mân kânok ninṅ sot tâtat mâme mân upi.

¹⁰ Den parâwan, zo um kâtik zeṅgât mân sâwan. Um kâtik a zen laṅ ândime. A zeṅgât kut ṅâi ṅâi âkṅâle op kâmbu upme. A lopio hurat kwap ândime. A um kâtik yatâ zo birâziṅgâbigât mân sâwan. Zen a yatâ zo dap yatâ zâmbam nanṅâbi. Zen hân birâm sumbemân zâim zâmbanbi, zorik.

¹¹ Nâ itâ zorat kulemgum ziṅgâwan. Nâiṅâ Yesugât kâmurân ândim bâliṅ mem ândiap, mo a ṅâigât kut ṅâi ṅâi âkṅâle op laṅ memap mo den bâliṅ sâm ândimap, mo lopio hurat kwâpmap, mo too kâtik nem um gulip opmap, mo kâmbu opmap. Kembugât kâmurân a bâliṅâ zo yatâ mem ândie, zen zot tâtat mâme mân upi. Oi nale mân ârândâṅ mân nimbi.

¹² Yesugât kâmut âkṅan ândie, zeṅgât den mân sâm kubikziṅgâbat. A Yesugât kâmurân ândie, zeṅgât tosaṅgât den sâm kubikziṅgânetâ dâp upap.

¹³ A âkṅan ândie, zeṅgât tosaṅgât den hâuṅâ

zo Anutuñâ sâbap. Zen ko bâliñ mâme a zo zengât osetziñan gâbâ diim âi âkñan pambi. Zâk osetziñan mân ândibap.

6

Den muyagei ziñak mân sâm kwâkâwe.

¹ Zengâren gokñandâ ñaiñâ bukuñangât kuk den mem ândibap, oi den zo Yesugât kâmut a sâtñâ zengâren mân sâm um kâtik a patâ zâkkâren sâbap? Zen zorat dap nâñge? Zo âlipñâ orotñâ?

² Yesugât kâmut a nen ñâran a um kâtik zengât den sâm kwâkânat. Zo nâñge? Oi zi Yesugât kâmurân gok zengâren den mâik ñai muyagei ziñak mindumindu op sâm mân kwâkâbi mo?

³ Ñâran nen sumbem a zengât den sâm kwâkânâman mân kwaknat. Zo nâñge?

⁴ Hânân narâk ziren den muyagei âlip sâm kwâkânat. Zorat wangât kut ñai yennangât den muyagei a um kâtikziñ zengâren mem âinetâ sâm kwâkâme.

⁵ Zen den zo nângâm añun upigât dâzâñguan. Zen dap nâñge? Zengâren a nângânâñgânoot ñai mân ândiap? Zengâren den ñai muyagei zâkkâren mem âine sâm kubikpap.

⁶ Nângânâñgânâ zo yatâ ziap. Zen ko yatâ mân upme. Buñâ. Yesugât kâmurân gokñâ ñaiñâ buku ñai sot den muyagei a um kâtik zengâren mem âine sâm kwâkâme.

⁷ Zengâren den âsagemap, zorâñ siñgi âlipkât kâwali koi gemap. Mâtâp ñai, zorat sa nângâne. A ñaiñâ kulem bâliñâ otgigi denân mân pam tosanâ birâñangâna yen zimbap. Tosa muyagei

um kâtik a zengâren mân pâmaban. Nâ zorat nânga mâtâp âlip nâi uap. Zen wangât yatâ mân upme.

⁸ Zen ziınak bâliñâ op bukurâpziıngât kut nâi nâi betziınan mime. Zo nâin goknâ buñâ, Yesugât kâmurân gok. Bukurâpziıñ zen sot ârândân upme.

⁹⁻¹⁰ Den zi nângâm biraıñbi. Bâliñ mâme a ambân zen Anutugât um topıñan mân ândibi. Zen umziıñ mân kâitkunek. Laıñ mâman a sot kware suıça mem ândiândiıñ. Ambân mem birâ sot bâliıñ upme, Kâmbu orot sot sikumgât âkñâlime, Too kâtik nem um gulip upme, A den bâliıñ sâme sot kâmbam ku. A yatâ zorâñ Anutugât um topıñan mân bagibi.

¹¹ Oi zengâren gâbâ a nâmbutıñâ ziıñ yatâ op ândiwe. Ka zen Kembuıñâ umziıñ saıgorip. Kembuıñâ um hâlâlu minziıngip sot tosa buıñ minziıngip. Zo Kembu Yesu Kristogât kot mem ândie sot Anutuniıngât Kaapum sot ândie, zorat yatâ otziıngip.

Bâliıngât girem den.

¹² A nâmbutıñâ ziıñ itâ sâme, “Kut nâi nâi, zo orotıñik ziap.” Ka nâñâ sa nângânek. Kut nâi nâi nâmbut orotıñâ zorâñâ mân betniınan memap. Kut nâi nâi, zo orotıñik ziap, Ka zobâ nâiıñâ kembu otnibâ sâi zâkkât kore mân upat.

¹³ Nalem, zo tep kâmbogât sıñgi. Oi tep kâmbu, zo nalemgât sıñgi. Bet Anutunâ sâi nalem sot tep kâmbu zo ârândân buıñ upabot. Sâkniıñ zo mâtâp ambân zen sot ândiândiıñ mo ambân nâmbutıñâ zen sot laıñ ândiândiıngât sıñgi buñâ. Zo Kembugât sıñgi. Kembu zâk sâkkât mariıñâ op ândiap.

14 Anutuñâ Kembu Yesu mumuñan gâbâ mângei zaarip. Zo yatik imbaññandâ mânginiñgâbap.

15 Nângâm birañbi. Kembugât kâmut nen Kristogât sâk bonñâ op ândien. Kristo zâk kâukniñ ândiap. Oi nen kiñ bikñâ yatâ op ândien. Oi zen dap nânge? Kristo sot pâlâtân op ândien, neñgâren gâbâ ñâiñâ âi mâtâp ambân sot pâlâtân op ândei dâp upap? Buñ kâtikñâ.

16 Zen itâ nângâm birañbi. “A ñâiñâ ambân lañ mâman ñâi sot pâlâtân oitâ zet sâk kânok upabot.” Zorat Kembugât ekabân den ñâi itâ ziap, “Zet zagâtñâ kânok op ândibabot.”

17 Nen âlip nângen. Ñâi zâk Kembu sot pâlâtân oi um dâpziñâ kânok upabot.

18 Zen lañ mâman ambân zo kândâtzângobi. A ñâiñâ bâliñâ nâmbutñâ upap, zorân sâkñâ mân tâmbetkubap. Ka ñâi zâk zik ambin birâm ñâi sot ândibap, zâk zikñâ sâkñâ tâmbetagobap.

19 Zen zitâ nângâme? Tirik Kaapumñâ umziñan tâtat mâme opmap. Zorat sâkziñ zo Tirik Kaapumgât namâ. Zâk zeñgât um sâkziñan ândibapkât Anutuñâ sângongoi geip. Zen sâkziñangât mariñâ buñâ.

20 Kembuñâ mârum sângânziñ mei zâkkât siñgi urâwe, ândie. Zorat zen sâkziñâ târârak galem op ândine a nâmbutñâ ziñâ ziñgitñâ Anutu sâm âlip kwâkñangâbi.

7

Ap ambin zeñgât den.

¹ Zen ekap kulemgum nim mâsikâniwe, zorat hâuñâ sa nângânek. Nâ itâ nângan. A ñâiñâ ambân mân mem yen ândei sâi ko âlip opap.

² Ka bâliñangât mâsimâsikâ gâi bâliñ upegât anâ ambân mem zâk sot pâlatân op ândibap.

³ Oi agât sâkñâ ambin mân angân kârâñangâbap. Oi ambân zâk yatik sâkñâ apñâ mân angân kârâñangâbap.

⁴ Ambân zâk sâkñangât mariñâ zikñik mân ândiap. Zo apñangât siñgi. Oi apñâ zo yatik sâkñangât mariñâ zikñik mân ândiap. Zo ambinñangât siñgi.

⁵ Zorat ap ambin zen sâkziñ mân angân kârâyangâbi. Yen ninâu sâm ândim den saam yatâ utne dâp upap. Satangât mâsimâsikâyân loribegât narâk pânkânogâk yatâ ândibi.

⁶ A ambân miangâbigât op san, zo sâm kâtigemñâ mân san.

⁷ Anutuñâ imbañâ nigî ambân mân mem yen ândian. Nâ ândian, yatik ândibigât otnigap. Ka Anutuñâ imbañâ ñâi zikñik zikñik niñgâmap. Nen dâbâk buñâ, ñâi itâ, ñâi yatâ. Zorat a ambân âlip miangâbigât san.

⁸ A ambân sigan sot malâ, zengât itâ san. Zen nâ yatâ op yen ândine âlip upap.

⁹ Ka zen umziñan âkñâleziñandâ diiziñgi bâliñan bagim tâmbetagobegât op miangâm ândibi.

¹⁰ Ap ambin zengât den sa nângânek. Den zi nâgât buñâ. Kembangât den. Zengâren gâbâ ambân ñâiñâ apñâ mân birâbap.

11 Oi ambinñandâ apñâ mârûm birip oi ko a buñâ, yen ândibap mo dum apñoot miangâm ândibabot. Oi yatik a ñainâ ambinñâ mân birâbap.

12 Nâmbutñâ zenğât den zi sa nângânek. Kembugât den buñâ. Zi ninâ den uap. Kembugât kâmurân a ñai âmbinñâ um kâtik ândibap, oi ambân zorâñ zâk sot ândibat sâi mân birâbap.

13 Mo Yesugât kâmurân gokñâ ambân ñai zâkkât apñâ um kâtik ândibap, oi a zorâñ zâk sot ândibat sâi mân birâbap.

14 A um kâtik zo ambinñâ Kembugât sinji, zâkkât mâsop zorâñ zâkkâren arip. Oi um kâtik ambân zo apñâ Kembugât sinji, zâkkât mâsop zorâñ zâkkâren arip. Oi yatigâk murarâpziñ Kembugât sinji op ândibi. Zo buñ sâi um kâtik ândibe.

15 Um kâtik a mo ambân ñainâ birâbam sâi mân anğân kârâñanğâbi. Zorat pâke mân ziap. Anutuñâ lumbenân ândibigât diizîngip.

16 Ambân, gâ apkâ Kembugât mâtâbân diina gâbap mo buñâ? Zo nângat?

A, gâ ambingâ Kembugât mâtâbân diina gâbap mo buñâ? Zo nângat?

17 Zen zikñik zikñik kinkin zoren mo zoren kine Kembuñâ ândiândi muyageziñgip sot nep sâm ziñgip, zo yatik sinji âlibân ândibi. Nâ den zo Yesugât kâmut kamân dâp dâzânğoman.

18 Zenğâren ñai zâk kwabâ kwâkñanğâne ândei Kembuñâ diinñgip, zâk mân birâbap. Oi a ñai zâk kwabâ mân kwâkñanğâne ândei Kembuñâ diinñgip, zâk kwabâ kwâkñanğâbigât mân sâbap.

19 Kwabâ kwatziŋgâwe mo kwabâ mân kwatziŋgâwe, zorat nâŋgâne bon mân upap. Anutugât den luluj, zorâŋ bonŋâ uap.

20 Nâi zâk kinkinŋâ zoren mo zoren kiri Kembuŋâ diigip, kinkinŋanâk zo kinbap.

21 Gâ kore mâman a ândina Kembuŋâ diigigipkât nâŋgâm kwâkâ mân upan. Olanŋinâ sâne mân kwâkâban.

22 Nâi zâk kore a op ândei Kembuŋâ bâliŋanŋât tâgân gâbâ olanŋanŋi Kembuŋât a bonŋâ op ândibap. Nâi zâk a bonŋâ ândei Kembuŋâ gâsui Kristogât kore a op ândibap.

23 Kembu zâk sâŋgânziŋ meipkât zâkkât kore a op ândie. Zorat a ŋaiŋâ kembu otziŋgâbâ sâi mân nâŋgâbi.

24 Bukurâpnâ, ŋai zâk kinŋâ ŋiŋi âlip nâŋgip, teŋgâ zorenâk narâk ziren kinŋâ Anutu sot pâlâtâŋ upap.

A ambân sigan, zeŋgât den.

25 A ambân sigan, zeŋgât den sa nâŋgânek. Zi Kembuŋât den buŋâ. Kembuŋâ tânnogi ŋiŋi âlip mem ândimanŋâ ninâ nâŋgânâŋgâyân den zi dâzâŋgua nâŋgânek.

26 Narâk zi mâte uap, zoren sâknam patâ muyagibapkât a ŋai zâk ambân buŋ ândibat sâm âlip upap.

27 Ka ambân mein oi ko mân birâban. Ambân mân sâm giwe oi ko ambânŋât mân sâban.

28 Gâ ambân mimbâ sâm mena mân bâliŋ upap. Oi ambân sigan ŋaiŋâ a ŋai mei mân bâliŋ upap. Ka mianŋgâbi, zen sâkkât nep tuum sâknam

nângâbi. Nâ zorat nângâm itâ san. Zen yen sigan ândine âlip upap.

²⁹ Bukurâpnâ den zi sa nângânek. Yesu takâbapkât narâk pânkânok uap. Zorat a ambirâpziņoot ândimeņâ ândinetâ ambirâpziņ buņ yatâ upap.

³⁰ Oi umbâlâ op isem ândimeņâ ândine umbâlâ buņâ yatâ upap. Oi sâtâre op ândimeņâ ândine sâtâre buņ yatâ upap. Oi kut nâi nâi kwâlâmeņâ ândine sikum buņ yatâ upap.

³¹ Oi kut nâi nâi aņgâgwanğâ upmeņâ ândinetâ yen ândime yatâ upap. Hângât kulem zi ek nângâme, zo buņ upap. Yesu takâbapkât narâk pânkânok uap, zorat den zo san.

³² Zen hânân ândim kut nâi yenņanğât mân nângâm kwâkâm ândibigât san. A, ambân buņandâ Kembuğât denâk nângâm ândimap. Kembuņâ zâkkât nâņgi âlip upapkât nângâmap.

³³ Ka a ambinņootņâ ko sâkkât kut nâi nâi zorat nângâmap. Oi ambinņandâ zâkkât nâņgi âlip upapkât nângâmap.

³⁴ A yatâ zo sâkkat kut nâi nâi sot Kembuğât nepkât nângâm um zagât opmap. Ambân sigân zen Kembuğât nepkârâk nângâme. Oi um sâkziņâ Kembuğât siņgi upapkât nângâme. Oi ambân a sotņâ sâkkât kut nâi nâi zorat nângâm ândibap. Apņandâ zâkkât nâņgi âlip upapkât nângâbap. Ambân zo yatâ zorâņ sâkkât kut nâi nâi sot Kembuğât nepkât nângâm um zagât opmap.

³⁵ Zen âlipņâ ândim kwâtâtibigât den zi dâzânğuan. Mâtâp pâke kwatziņğâm mân san.

Um nângânângâziņ zo Kembangâren pane ze i ândibigât otnigi yatâ san.

³⁶ Oi a nâi zâk bârâtņâ a mimiņangât dâp oi angân kârâbâ sâm upap. Oi bet nâņgi mân dâp oi ayân pâmâ sâm pâi mân bâliņ upap.

³⁷ Nâi zâk umņandâ itâ nâņgâbap, “Bârâtņâ yen ândibap.” Yatâ sâm um zagât mân upap. Yatâ sâm kâtigei dâp upap.

³⁸ Zorat itâ sa nâņgânek. Nâi zâk bârâtņâ ayân pâi âlip upap. Ka a nâi zâk sâi bârâtņâ yen ândei âlip nâi upap.

Malâ zengât den.

³⁹ Ambân nâi zâk apņâ ândei mân birâm ândibap. Apņâ moi ko a nâi mimbâ sâm âlip mimbap. A zo Kembangât a ândiap oi ko âlip miangâbabot.

⁴⁰ Ka ambân zorâņ apņâ buņ yen ândibat sâm yen ândibap. Zorat nâņga âlip upap. Zo yatâ nâņgan. Oi den zo ninâ umgârâk buņâ. Anutugât Kaapumņâ nâņgânâņgânâ zo nig i san.

8

Lopiogât sinji nalem, zorat den.

¹ Lopiogât sinji sii nalem, zorat sâbâ. Korinti a zen itâ nâņgâme, “Nen aksik top nâņgânâņgâniņoot ândien.” Ka nâ itâ sa nâņgânek. Top nâņgânâņgâ zorâņ zâizâiņ muyagemap. Oi zen mân zâizâiņ upigât otnigap. Buku op ândiândiņ zo ko berân miangâm âlip ândibi.

² Nâi zâk buku orot mân op ândimņâ Anutugât topņâ nâņgâm kwâtâtian sâmap, zâkkât itâ sânat,

“Zâk mân nângâm kwâtâtiap. Nângânângâ bonnâ mân zemņângap.

³ Nâi zâk umņandâ Anutu gâsubap, zâk Anutuņâ buku okņangâbap.”

⁴ Lopiogât siņgi sii nalem, zorat itâ nângâmen, “Lopio zâk bonnâ buņâ. Zâk wâgân mân ândiap.

⁵ Anutu zâk kânokņâ bonnâ ândiap.” Nen yatâ nângâmen. Ka a um kâtik zen itâ sâme, “Hânân sot sumbemân lopio sot kembu donbep ziap.”

⁶ Nen ko itâ nângen, “Anutu Ibâniņ, zâk kânok ândiap. Zâkkâren gâbâ kut nâi nâi muyagem naņgip. Oi nen zâkkât siņgi ândien. Oi Kembu kânok, Yesu Kristo. Anutuņâ sâi Yesu Kristo, zâk nen sot kut nâi nâi aksik muyageniņgip. Oi zâkņâ galem otņiņgi ândien.”

⁷ Kembangât kâmurân a nâmbutņâ zen topņâ yatâ zo mân nângâm ândie. Zen mârumņan gâbâ lopio hurat kwap ândim gawe. Zen siņgi âlibân bâbâ lolot ândime. Zen lopio zorat nângâne bon oi um kâtik, ziņ nalem lopiogât siņgi sâne zo nemņâ umziņ sumunkomap.

⁸ Nâ den sa nângânek. Anutu zâk nalemgât opņâ nâņgi mân zâizâiņ uap. Nen sii nalem birindâ neņgât mân nâņgi geibap. Mo nalem neindâ mân nângâniņgi zâibap. Buņâ. Nalem, zo yenņâ.

⁹ Zeņgâren gâbâ nâmbutņâ ziņâ nalemgât topņâ nângâm nalem nem tatne bukurâpziņ siņgi âlip bituktâ zemziņgap, zen ziņgitņâ bâliņ upegât galem oraņgâm ândibi. A lolot yatâ zo lopiogât siņgi nalem nemņâ umziņ sumunkomap.

¹⁰ Gâ lopio zâk bon buŋ sâm lopio namin zâim nalem nem tâtna bukugâ ñâi lotñâ, um oset a ga gekñâ niapkât nimbâ sâm zo yatik nemñâ umñâ sumunkumbap.

¹¹ Bukugâ sinji âlip bituktâ zemñângap, zâk Kristo gilâmñandâ sângân meip. Zâk gâgât kâtikkanğât lorebapkât girem uan.

¹² Zen lopiogât sinji nalem nemñâ bukurâpziŋ um oset ândime, zen umziŋ mem tâmbetkune um gulip upi, zo ko yatik Kristo tâmbetkubi yatâ upap.

¹³ Zorat nâ sii nalem nimbam bukunâ lolot zo tâmbetkubatkât nângâm kwâkâ op sii nalem birâm yen ândibat. Zo yatik op ândimâmbat.

9

Paulo zâk nepñangât den sâip.

¹ Korinti a zen nâgât dap nânge? Nâ Aposolo buñâ? Nâ yatâ mo yatâ upatkât otnigi saanine dumunân ândian? Nâ Kembuniñâ Yesu Kristo mân egâwan? Korinti a zen ziiñak topnâ nângâm biranbi. Nepñangât bonñâ Kembugât mâsobân muyageip, zorat ko zen sinji nângâ a ambân urâwe, zo.

² Kamân ñâin gok nâmbutñâ zen nâgât Aposolo mân sâme motñâi. Zen ko topnâ âlip nânge. Nâ perâkñak zeñgât Aposolo op ândiman. Nâ Aposolo nepnângât bonñâ Kembugât mâsobân zen Kembugât a ambân urâwe.

³ A ninâ topnañgât sâme, zen den itâ mâburem ziŋan.

⁴ Zeñgâren gâbâ nâmbutñâ zen nen nepniñangât sângân zeñgâren gâbâ too nalem mân

minatkat sâme. Zen wangat yatâ sâme? Aposolo nâmbutnâ zen mâtâbân âim gane too nalem zingâme.

⁵ Aposolo nâmbutnâ sot Petero sot Kembangat murâpnâ, zen ambirâpziñoot kamân toren toren âim gane nalem mot zingâne aposolo nep tuume. Oi nâmbutnâ nen yatâ mân utnatkat sâwe.

⁶ Nâ sot Banaba, net betnâ nep tuum ândim kat muyagem sâkkat kut nâi nâi sângân mem ândiratkat se. Net yatik op ândim mân birâratkat se.

⁷ Den nâi mâsikâzinga sânek. Kâwali a nâinâ ziknâ nalem sot kut nâi nâi muyagemap? A nâinâ nep kârâm kâmiri bonnâ muyagei mân mem nimbap? Mo nâinâ noniñ makau nepnâ tuumnâ zengât nam mân mâsan nimbap?

⁸ Den zi a den san? Bunâ. Kembangat gurumin den ekabân den yatik ziap.

⁹ Mosenâ Kembangâren gâbâ den mem itâ kulemgoi ziap,

“Wâugâ zuu zigi mem ko goka mân pindâna mân dâp upap.”

¹⁰ Oi dap nânge? Den zo Anutunâ wâu zengârâk nângâm sâip? Mo nenngât nângâm sâip? Den zo a nenngât op sâip. Nâi zâk nepnâ kârâm kâmitmap, zâk bonnâ oi nimbatkât nângâm nep zo tuumap. Oi yatigâk nâi zâk nebân hibuk pitâbap, zâk bonnâ muyagei nimbatkât nângâm tuubap. Anutu zâk yatâ nânji ziap.

¹¹ Nen zengâren umgât nep tuumnâ zengâren gâbâ sâkkat kut nâi nâi minatkat nângâne yâmbâremap?

12 A nâmbutņâ ziņ zeņgâren gâbâ nalem sikum minetâ nen zeņgâren nep topkwap tuuwennâ mân minatkât se?

Nâ itâ sa nâņgânek. Nen Kristogât siņgi âlip laņ kâri pâke pambemgât zeņgâren gâbâ nalem sikum mimiņâ sâsâņ, zo birâm betņâ sâknam nep tuum nalem mot muyagem nem ândiwen.

Paulo zâk nep tuum Korinti zeņgâren gâbâ sâņgâņņâ mân meip, zorat sâtâre oip.

13 Kembangât siņgi nalem uuņâ a tirik namin nep tuum ândime, zen namin nalem mem nime. Oi Anutugât siņgi nalem kut ņâi ņâi pâpanņâ, zoren tuume, zen zoren gâbâ nalem nâmbutņâ mem nem ândime.

14 Kembu zâk siņgi âlip sâsâņ a, nen yatik siņgi âlip sâindâ betniņan mimbigât sâip.

15 Nâ ko mâtâp zo mân lânman. Kât sikum mân meman. Oi zen yatik otnibigât ekap zi mân kulemgum ziņgan. Nâ zeņgâren gâbâ kât mot mân meman, zorat sâtâre opman. Oi nâ itâ nâņgâm kâtigian. Nâ yatik op ândim ma ko mumbat. A ņâiņâ kât nigi ko nâ dap yatâ zâizâiņ op sâtâre den dum sâbat? Zorat kât mot zeņgâren mân mimbat.

16 Nâ siņgi âlip den dâzâņgom ândiwan, zorat dap yatâ zâizâiņ den sâbat? Nep zo Anutuņâ kwâknan pâip. Den siņgi âlip zo mân dâzâņgobat oi ko, yei, Kembuņâ dap otnibap?

17 Nep zo ninâ umgât tuuwan sâi ko sâņgân membam. Ninâ umgât mân tuumangât zâizâiņ mân upat.

18 Zâizâin opman, zorat topnâ itâ. Nâ sinji âlip mem ândiman, zo a dâzângom ândim zengâren gâbâ sângân mân meman. Nâ zorat sâtâre opman. Oi sinji âlip sâman, zo sângânñâ sâkkât kut nâi nâi mimban sânetâ birâman.

Paulo zâk a top top zengât kore a oip.

19 Nâ a aksik zengât dumunân mân ândiwan. Kore mâman mân ândiwanñâ laj kore otzingâm ândian. A donbep zin sinji âlip nângâm Kembangât sinji upigât yatâ op ândian.

20 Yuda a zen sot ândim Yuda zengât orot mâmegât tengâyân ândiwan. Zo Yuda a zin Kembangât sinji upigât yatâ orâwan. Mosegât gurumin den zo lum kore upme, zen sot ândimñâ gurumin dengât kore a yatâ orâwan. Ninâ gurumin dengât kore a bujandâ a kore upme, zen Kembangât sinji upigât orâwan.

21 Um kâtik a, Kembangât den mân nângâme, zen sot ândim zin ândime, zo yatâ orâwan. Um kâtik a, zen Kembangât sinji upigât yatâ orâwan. Nâ Anutugât mâtenjan gurumin den mân nângâm ândim buj. Nâ Yesu Kristogât den kâtik, zo mem ândiman.

22 A sinji âlip bituktâ zemzingap, zen sot ândim orot mâmezij yatâ op ândiwan. Zen Anutugât sinji âlip nângâm Kembangât sinji upigât yatâ orâwan. A top topnâ zengâren ândim zengât holiyâk mem ândiman. Zo nâmbutñâ zin Anutugât sinji upigât yatâ op ândiwan.

23 Zo yen bujâ. Sinji âlip laj kârâm âibapkât yatâ opman. Oi sinji âlip bonñâ zo nâgâren sot zengâren âsagibapkât yatâ op ândiman.

Sârârâk kârâm kâtigem âi kikerân takâm neule muyaginat.

²⁴ Zen itâ nângâme mo? Dâp orotņangât sombemân a katep zen aksik sârârâk kârâbi. Ka neule mimiņ, zo ko a kânokņak kâtigem âi mimbap. Oi zen yatik sumbemân neule mimbigât kâtigibi.

²⁵ Katep zen imbanâziņangât dâp op kendon ândime. Zen neule yenņâ, ziniņ kâtik buņ, zorat yatâ upme. Nen ko sumbemân neule ziniņ kâtik, zorat yatâ utnat.

²⁶ Nâ ninak sârârâk kârâman, zo kiket zo ekņâ târâragâk âiman. Nâ kâlâunâ yenņan mân lum pâman.

²⁷ A siņgi âlipņâ dâzâņgom ândia Anutuņâ nâgât nâņgi mân dâp oi kâbakņenigi ginņâ opamgât sâknaņgât âkņâle zo mem gei kwap kubikņâ sâknaņgât a kutâ op ândiman.

10

Isirae a zengâren kut ñai ñai muyageip, zorâņ giremniņ uap.

¹ Bukurâpnâ, nâ Isirae a sâkurâpniņâ kut ñai ñai urâwe, zorat sa nângânek. Zen aksik Mose sot unumunum ombeņan âim saru nirem nâmbut âiwe.

² Zen aksik Mosegât kâmut upigât unumunum ombeņan âim saru nirewe. Too zorâņ too saņgonziņgip yatâ oip.

³ Oi Anutuņâ nalem muyagem ziniņ zen aksik niwe.

⁴ Oi too Anutuñâ muyagem zingip, zo zen aksik niwe. Too zo Anutugât kârân gâbâ gei niwe. Oi kât zorat kutñâ Kristo. Kristo zâk hân kabânan too zingip, zorat dâp galem otzingâm ândeip.

⁵ Ka zengâren gâbâ donbep patâ Anutuñâ zingiri mân dâp oi mirâ kamân kâtikñan kâbakñezingi mom nanğawe.

⁶ Zengâren kut ñâi ñâi muyageip, zorâñ giremniñ uap. Zen bâliñ urâwe, zo nen yatik upemgât.

⁷ Mosegât kâmurân gâbâ nâmbutñâ zen lopiogât kore mâman urâwe. Korinti a zen ko yatâ mân upi. Mosegât a gakârâpñâ, zen Kembugât nelâmzânğoi lopiio sobim sâtâre urâwe. Zorat Kembugât ekabân den ñâi itâ ziap,

“A zen ge tap sii nalem nemñâ zaat kep kom kirâwe.”

⁸ Oi Mosegât kâmurân gâbâ nâmbutñâ zen lañ op ândiwe. Nen a ambân lañ ândiândiñ zo yatâ mân utnat. Zen bâliñ urâwegât sirâm kânogân 23 tausen yatâ zo ziñ muwe.

⁹ Nen ko Kembugât mâtenjan bâliñâ mân utnat. Zâizâiñ mân utnat. Zengâren gâbâ nâmbutñandâ zâizâiñ utne Anutuñâ sâi mulumñâ zingi muwe.

¹⁰ Oi nen Kembugâren âkon den mân sânat. Zo zengâren gâbâ nâmbutñandâ âkon den sâm Kembu sâm bâliñ kwâkñanğane tâmbet tâmbet mariñandâ tâmbetzânğoi.

¹¹ Zengâren kut ñâi ñâi âsageip, zorâñ giremniñâ uap. Hângât narâkñâ âkâbâ sâi narâk patâ mâte oi ândien, neñgât den zi sâm giremniñ kulemguwe.

12 Zorat Korinti a zengât girem den nâi dâzângua nângânek. Nâi zâk ziknangât nângi zâizâinj op itâ sâmap, “Nâ a kâtiknâ.” Yatâ sâbap zo ko lorebapkât galem orangâm ândibap.

13 Zengâren mâsimâsikâ âsagem gâip, zo a donbepziņangât dâp muyagemap. Oi Anutuņâ sâi kâtigemap, zâk mâsimâsikâyân mem bâbâlân koi imbanâziņangât dâp mân walâbap. Oi mâsimâsikâ gâbap dâp mâtâp nâi tirâpziņgoi âlip kâtigem kinbi.

Kembugât nalem nem Satangât nalem ninij, zo mân taap.

14 Zorat opnâ bukurâpnâ, zen lopio sot lopiogât sinji sii nalem, zo kândâtkom ândibi.

15 Zen nângânângâziņoot ândime, zorat den zi sa ziņak nângâm iknek.

16 Waiņ hâkobân zeip, zorat sâiwap sâmņâ nemņâ Kristo gilâmņangât op târotâro upmen. Nalem namuņ nemņâ Kristogât sunum sot târotâro upmen. Zo nângâm biranĭbi.

17 Nalem kânok zo nemņâ a donbep nen kâmut kânok upmen. Kristo sot pâlâtânĭ op kâmut kânok upmen.

18 Zen Isirae a ziņ upme, zo nângânek. Kembugât tirik namin Kembugât sinji nalem uuņâ a ândime, zen nep zo tuum ândim Kemu sot târotâro upme. Oi zen kâmut kânok op Anutuĭgât sinji nalem pâpanĭan nep tuum zobâ nalem nâmbutuĭâ mem nem ândime.

19 Den san, zorat topnâ dap yatâ? Lopiogât sii nalem nininâ, zorat nângâne bon upapkât san

mo? Mo lopiogât zikņangât nāngâne bon upapkât san?

²⁰ Yatâ buņâ. Den san, zorat topņâ itâ. Um kâtik a, zen ko lopiogât sii nalem ume, zo Anutugât sinġi buņâ. Zo Satanġ sot wâke, zengât sinġi uap. Oi nâ Korinti a zengât itâ san. Zen Satanġ sot wâke zen sot târotâro mân upi.

²¹ Kembugât hâkobân gâbâ too nem wâke zengât hâkobân gâbâ too niniņâ, zo mân taap. Oi Kembugât nalem nemņâ wâke zengât nalem niniņâ, zo mân taap.

²² Kembu zâk kuk otniņgâbapkât yatâ utnat? Mo dap nânġe? Neņġât imbaņandâ zâk wâlap? Yatâ buņâ.

Nâi zâk zikņangât nânġi zari ândei mân dâp upap.

²³ A ziņ itâ sâme, “Kut nâi nâi, zo orotņik ziap.” Ka nâ itâ sa nāngâne. Kut nâi nâi nâmbutņâ oindâ zorâņâ mân betniņan mimbap.

²⁴ Nâi zâk zikņangât mân nâņġâm bukuņangât nâņġâbap zo ko âlip upap.

²⁵ Aņġâgwangâ minduminduyân zuu bâu sâņġân minâ sâm âlip mimbi. Um oset mân upi. Zi lopiogât sinġi sâm mân mâsikâziņġâbi.

²⁶ Wangât, Kembuniņâ zâk hân sot kut nâi nâi piksâm ziap, zorat mariņâ ândiap, zorat.

²⁷ A um kâtik nâiņâ buku otziņġâm mirânan zâinâ sâi zâibi. Oi sii nalem ziņġi zorat topņâ mân mâsikâm nimbi.

²⁸ Ka nem tatnetâ bukuziņâ nâiņâ ga dâzâņġobap, “Bâu zi lopiogât sinġi sâsâņan

gokñâ.” Yatâ sâbap oi ko mân nimbi. Zo sâm muyagem zingâbap, a zâkkât op nângâm birâbi.

²⁹ Zo nine umziñ sumun opapkât buñâ. Nalem zo ninetâ sâi ko bukuziñâ niegât nimbâ sâm nem um sumun opapkât. Nâ yatâ sa zengâren gâbâ ñâiñâ itâ sâbap? “Ninâ umnâ nângâm kwâka mân zeï upâ sa bukunâ ñâiñâ pâke pâmbap?”

³⁰ Nâ Anutugâren sâiwap sâm nia wangât bukunâ ñâiñâ nângâm bâliñ kwatnibap?”

³¹ Nâ zorat itâ sa nângânek. Zen sii nalem ninam mo kut zo mo zo utnam a ziñ zingitñâ Anutu sâm âlip kwâkñangâbigât nângâmñik upi.

³² Zen Yuda a sot Grik a sot Anutugât kâmut zengât mâteziñan tosaziñ buñ ândine âlip upap.

³³ Nâ yatigâk a top topñâ zen niknetâ dâp upapkât nângâm ândiman. Nâ ninangât nângâm buñâ. A donbep, zengât nângâm opman. Zen Kembugât siñgi âlip nângâm âlip upigât nep tuman.

11

¹ Nâ Kristogât mâtâp lânman. Zen zo yatik orot mâmenâ ek nângâm wâratkum ândibi.

A ambân topniñâ.

² Zen kut ñâi ñâi orâwan sot den dâzângowan, zorat nângâm lum upme. Zorat nânga âlip opmap.

³ Oi zi den ñâi sa nângânek. Kristo zâk agât kâukñâ. Anâ ambângât kâukñâ. Oi Anutu zâk Kristogât kâukñâ.

⁴ Minduminduyân a ñâi zâk kâuk pâkenâ tâi ninâu sâbap mo Anutugât den sâm muyagibap. Yatâ oi kembu patânâ anjun upap.

⁵ Minduminduyân ambân nâi zâk kâuk pâke buŋ ândim ninâu sâbap mo Anutugât den sâm muyagibap. Zâk yatik oi apnâ aŋun upap. Ambân yatâ zo, zâk ambân laŋ ândiândiŋ kâukziŋ sâmot mimiŋâ, zen yatâ aŋun upap.

⁶ Ambân nâi kâuk pâke mân pam ândei kâuknâ mânângât naŋgâne aŋun oi dâp upap. Ka ambân zo yatâ oknângâbigât aŋun opnâ kâuk pâke pam ândibap.

⁷ Minduminduyân a zâk kâuk pâke mân pam ândibap. A, zâk neule âsaknâ mariŋâ, Anutu, zâkkât holi tobat sot wikin yatâ. Ambân ko, zâk agât wikin.

⁸ A, zâk ambângâren gâbâ mân muyageip. Ambân nâ agâren gâbâ muyageip.

⁹ A, zâk ambângât opnâ mân muyageip. Buŋâ. Ambân, zâk agât opnâ muyageip.

¹⁰ Ambân, zâk agât ombeŋan ândiapkât kâuk kâpim ândibap. Yen ândei sumbem a ziŋ iknetâ bâliŋ opapkât sâsân.

A sot ambân, nen ârândân Kembugât mâteŋan kinat.

¹¹ A, zâk zikŋik Kembugât mâteŋan mân kinbap. Ambân, zâk zikŋik Kembugât mâteŋan mân kinbap.

¹² A ambân ârândân kinbapot. Ambân, zâk agâren gâbâ muyageip. Zo yatik a nen ambân zeŋgâren gâbâ âsagimen. Nen sot kut nâi nâi zo Anutugâren gâbik gawen.

¹³ Zen ziiŋak nâŋgâm iknek. Minduminduyân ambân nâi kâuk pâke buŋ ândim Anutugâren ninâu sâi dâp upap mo buŋâ?

14 Oi a nâi zâk kâuk sâmotnâ kârep mem ândei ikne dâp upap mo bujâ? Zorat topnâ mârur sinji âlip mân mem ândiwe, zen zoren nângâm ândiwe.

15 Oi ambân nâi kâuk sâmot ilimbam tâi ikne âlip opmap. Anutuñâ kâuk sâmot ilimbam zingâmap, zo kâuk pâkeziñ. Kâuk sâmot ilimbamñâ zo zâkkât neulenâ.

16 Nâi zâk den zi birâbâ sâm itâ nângâbap. Zo birâbirân, zo nen sot Anutuğât kâmut nâmbutnâ nen mân upmen.

Korinti a zen nalem nem gulipmalip urâwe.

17 Zen mindumñâ kut nâi ziñ upme, zorat nânga mân dâp oi girem dâzânguan. Zen âlip mân opnâ bâliñ op ândime.

18 Yesugât kâmut zen mindunetâ kâsâp muyagemap. Zen ziiñak kâmutnâ kâmutnâ sâm kâsâpagome. Yatâ sâm dâtnone nânga perâkñak yatâ uap.

19 Oi kâsâp zo yen bujâ. Zengâren gâbâ nâmbutnandâ den sinji âlip mem kâtigie, zengât topziñ muyagibapkât âsagiap.

20 Ka zen nalem ninam mindumñâ Kembugât nalem kâtik nem gulipmalip upme.

21 Nalem mem gamñâ ziiñâ kâsâpkum zikñik zikñik nime. Nâi zâk tepñangât opmap. Nâi zâk âkon buj nemap. Nâi zâk too waiñ donbep nemñâ um gulip opmap.

22 Wangât yatâ upme? Ziiñ mirâ kârum ko yatâ upme? Zen nalem too ninâ sâm mirâziñan nimbe. Zen wangât Anutuğât kâmut zengât nângâne gigin oi a kanpitâ sot nalem buj ândime, zen anun kwatziñgâme? Zorat wan den dâzângobâ? Nâ

sâm âlip kwatziŋgâbat? Buŋâ. Nâ zirat mân sâm âlip kwatziŋgâbat.

Kembugât nalem ninij, zorat den.

²³ Nâ Kembugâren gâbâ den mewan, zo ziŋgâwan. Zo itâ. Kambu Yesu zâk Yudaŋâ tirâpzâŋgoi gâsuwe, zo mân âsageip, narâk zoren Yesu zâk arâpŋâ sot tap nalem meip.

²⁴ Nalem ŋâi memŋâ sâiwap sâm namuŋ itâ sâip, “Zi sunumnâ. Zi zeŋgât siŋgi san. Nâgât nâŋgâm nalem zi itâ nem ândibi.”

²⁵ Nalem ninetâ Yesuŋâ waiŋ too hâkop memŋâ itâ sâip, “Hâkop ziren târotâro irakŋaŋgât gilâmnâ taap. Gilâmnandâ narâk ziren târotâro irakŋâ âsageziŋgâbap. Nimbi dâp nâgât nâŋgâm yatik nem ândibi.”

²⁶ Zen nalem sot too zo nimbi dâp Kambu moip, zorat siŋgi sâm muyagem ândine âburibap.

²⁷ Zorat ŋâi zâk mân orotŋâ opŋâ Kembugât nalem sot too, zo nimbap, zo nem gulipkum tosa mimbap.

²⁸ Zorat nalem sot too zo ninâ sâm umziŋaŋgât topŋâ ek nâŋgâmŋâ Anutugâren sâm muyagemŋâ nimbi.

²⁹ Nâi zâk Kembugât sunum egi yenŋâ oi nimbap, zâk hâuŋâ mimbap.

³⁰ Zen zo yatâ gulip upmegât nâmbutŋâ lolot sot nâmbutŋâ sisi mâsek sot nâmbutŋâ mârum muwe.

³¹ Niŋak um topniŋ ek nâŋgâm kubigindâ sâi ko Kambuŋâ hâuŋâ mân niŋgâbap.

³² Ka gulip okŋaŋgindâ Kambuŋâ hâuŋâ niŋgâm kubikniŋgâmap. Um kâtik, zen sot tâmbetagobemgât op zo yatâ kubikniŋgâmap.

³³ Bukurâpnâ, zen nalem ninam mindum tat-netâ aksik gam nanğânetâ ko topwkap nimbi.

³⁴ Nâi zâk tepņanğât okņanği zikņâ mirin nalem nimbap. Zen mindum Kembugât nalem kâtik nem gulipkune hâuņâ muyageziņğâbapkât yatâ upi.

Den nâmbutņâ zo ninak gam dâzânğobat.

12

Kaapumņâ neņğâren nep tuumap.

¹ Bukurâpnâ, Nen nep top top tuunat, zorat Kaapumņâ imbaņâ niņğâmap. Zorat kwakpegât dâzânğua nânğânek.

² Zen mârumņan um kâtik ândine a ziņ di-iziņğâne lopio diņ buņ, zâkkâren pâlâtân op ândiwe. Zen lopiogât kembuniņâ sâm kiņ topņan ândim gulipmalip op ândiwe.

³ Zorat torenņâ nâi itâ sâm dâzânğua nânğânek. Nâi zâk Anutugât Kaapumņâ mam okņanği dap op itâ sâbap? “Yesu, gâ sâm bâliņ kwatgigan.” Oi nâi zâk Tirik Kaapumņâ mam mân okņanği dap op itâ sâbap? “Yesu, zâk Kembu patâ.”

⁴ Anutugât umâlepņanğât op sâi Kaapumņâ imbaņâ niņgi nep top top tuumen. Kaapum, zâk kânok.

⁵ Kore orotņâ top top ziap, zo donņep. Nep mariņâ, zo Kembu kânok.

⁶ Siņgi âlipkât mâtâp topņâ topņâ ziap. Imbaņâ mariņâ Anutu kânok. Zâk imbaņâ muyagem niņğâmap.

⁷ Kembugât kâmurân nen ârândân âlip ândinatkât Kaapum zâk a kânok kânok imbaņâ

muyagem ningâmap. Nâi zâk Kaapumñâ mam okñangi kut ñâi ñâi âsagemap, zorat topñangât den nângâm sâmap.

⁸ Nâi zâk Kaapumñâ mam okñangi den nângânângâ zo sâmap. Nep zagât, zo mariñâ Kaapum kânok.

⁹ Nâi zâk Kaapumñak mam okñangi nângâm pâlatân patâ op ândimap. Nâi zâk Kaapumñak mam okñangi a sisi mâsek kubikziñgâmap.

¹⁰ Oi ñâi zâk sen mârât kulem tuubapkât imbanâ pindâmap. Nâi zâk Anutugâren gâbâ den mem sapsubapkât imbanâ pindâmap. Nâi zâk Kaapumñâ imbanâ pindi den sot kut ñâi ñâi zorat topñâ nângâm kubik sapsuamap. Zâk itâ sâmap, “Zo Kembugât Kaapumân gok.” Mo itâ sâmap, “Zo wâke sot Satañ, zengâren gok. Zo bâliñâ.” Nâi zâk siñgi âlip den gându uñakñan sâbapkât imbanâ pindâmap. A ñâi den gându uñak zo nângâm a dinniñan melânbpapkât imbanâ pindâmap.

¹¹ Nep top top zo Kaapumñak tuumap. Kaapum zâk zikñak nângâm nep zo mo zo a mariñ dâp kâsâpkum niñgâmap.

Sâkniñ ko kânok, kore mâman donbep.

¹² A nen sâkniñandâ kânok, ka sâkkât kore mâman, zo donbep. Oi zen donbepñâ mâpotnetâ sâk kânok uap. Oi Kristogât kâmut nen zo yatik.

¹³ Kaapum kânokñak tooyân mâpotniñgi kâmut kânogâk urâwen. Yuda a sot hân ñâi gok, Kore a sot a kutâ, nen aksik Kaapum kânok zorigâk miwen. Kaapumñâ umniñan piksâm zimbapkât miwen.

14 Oi sâkkât kore, zo kânok bujâ. Zo donbep.

15 Oi ki zâk dap op itâ sâbap? “Nâ bet bujâ. Nâ sâkkât torenjâ mân uan.” Den yatâ sâmjâ dap op sâk birâm zikjik ândibap.

16 Mo kindap zâk dap op itâ sâbap? “Nâ sen bujâ. Nâ sâkkât torenjâ mân uan.” Yatâ sâmjâ dap op sâk birâm zikjik ândibap.

17 Sâgân sinnijâ zei sâi ko sâkijâ kindap kârubap. Mo sâgân kindabâk zine sâi sângân kârubap.

18 Anutu zâkijâ yatâ nângi zeipkât sâkkât kore nep top top sâm ziŋgip.

19 Sâkkât kore mâman zen nepziŋ kânok oi sâi sâk zâk bâliŋ opjâ buj opap.

20 Zi ko kore mâman donbep, ka sâk ko kânok.

21 Sennâ dap op bet itâ dukubap? “Nâ gâ bujik âlip ândibat.” Mo kâukijâ dap op ki itâ dâzâkobap? “Nâ zet bujâ âlip ândibat.”

22 Yatâ mân ziap. Sâkninangât torerâpñâ lolotjâ zen buj utne sâi âlip mân ândibem.

23 Oi sâkniŋangât torerâpñâ giginâ ziŋjâ galem otziŋgâmen. Oi sâkniŋangât torerâpñâ mân igikjâ zo ekap zângoindâ âlipjâ yatâ ândime.

24 Sâkniŋ torerâpñâ muyap zime, zo yatâ neule mân pam ândimen. Oi Anutujâ sâk muyagem torerâp nâmbutjâ giginâ zen nep patâ sâm ziŋgip.

25 Zo sâkniŋangât torerâp kâsa mân op kore oraŋgâm ândibigât yatâ oip.

26 Zorat torenjâ nâijâ sâknam nângi nâmbutjâ, zen ârândâŋ nângâbi. Mo nâijâ sâtâre oi nâmbutjâ zen yatik sâtâre op nangâbi.

Nep a topjâ topjâ ândie.

²⁷ Zen aksik patâ mâpotne Kristogât kâmut ue. Nep top top tuume, zo ko zen kâmut kânok ue. Zen Kristogât sâk bonjâ yatâ ue. Kristo zâk kâukziņ ândiap. Oi zikņik zikņik sâkņangât kore mâman ue.

²⁸ Oi Anutu zâk kâmut gakârâpņâ, neņgâren a itâ nâambarip. Aposolo gâsum sâlâpnângoip. Ombenjan Anutugâren gâbâ den mem sâsâņ a. Ombenjan den siņgi âlip kwâkâm ziņgâziņgâņ a. A sisi mâsek kubikziņgâziņgâņ, berân mâme a sot a sâtņâ, oi a den gându mârâtņan sâsâņ. Zo yatâ nâambarip.

²⁹ Nen Aposoloyâk nâambarip? Mo nen aksik Propete a mo kwâkâm ziņgâziņgâņ a nâambarip? Nen aksik sen mârât tuutuunangât imbaņâ niņgip? Zo yatâ buņâ.

³⁰ Nen aksik patâ sisi mâsek kubikkubikņangât imbaņâ niņgip? Mo den gându uņakņan sânatkât imbaņâ niņgip sot den zo nâņgâm melâņnatkât imbaņâ niņgip? Yatâ buņâ.

³¹ Zorat itâ sa nâņgânek. Zen Kaapumgât imbaņan Yesugât kâmut mem kâtikņan kwatziņgânam op nep tuubi. Nep top top zorat san. Zi ko nep zo tuubigât nâņâ mâtâp âlipņâ ñâi, zorat dâzâņgua nâņgânek.

13

Umniņandâ mân gâsâyagom nep âlip tuugindâ mân dâp upap.

¹ Nâ Kaapum imbaņâņan a gânduyân mo sumbem a zeņgât gânduyân Kembangât den sâbam

ua umnandâ bukurâpnâ mân gâsâzângobap zo ko sa lâmun kâmam yatâ den kwamitnik opap.

² Nâ Propete op ândim kut nâi nâi âsagemap, zorat topnâ nângâbam sot sinji âlipkât topnâ nângâm kwâtâtebam oi baknâ sa âbângubapkât zorat nângâm pâlatân imbanâ zemnigi sâi ko umnandâ bukurâpnâ mân gâsâzângobap, zo ko nâ a yenjâ opam.

³ Oi kut nâi nâinâ zemnigap, zo a kanpitâ zingâm nanjâm sâknâ bira kârâpkât sinji opap, oi umnandâ bukurâpnâ mân gâsuzingâbap zo ko nâ a yenjâ op nanjâbat. Kut nâi nâi zo ua sâi zorânâ âlipjan mân kwatnibap.

Buku opnâ mâtâp âlipnâ lânjat.

⁴ Nâi zâk umjandâ bukurâpnâ gâsuzingâmapnâ lumbenâ ândibap. Bukurâpnâ, zen kuk mân otzingâbap. Zâk sâk mâme mo zâizâin mân upap.

⁵ Kut nâi mân orotnâ zo mân upap. A zo ziknâ kutnâ mân mem zaatpap. Um kâlak bunâ. A zengât tosa mân mem ândibap.

⁶ Bâlinandâ lanj kâri umbâlâ upap. Oi den bonjandâ lanj kâri zorat umâlep upap.

⁷ A umjandâ bukurâpnâ gâsâzângomap, zâknâ bukurâp zengât nângi zâizâin opmap. Oi bukurâpnâ zinj kulem bâlinâ oknanjâne mân lorebap. Oi sâknam sot kut nâi nâi bâlinâ zo zâkkâren muyagei mân lorem kâtigem kinbap. Anutunâ gâtâm tânnângobap, zorat umâlip op mambât ândibap.

Buku orotnâ, zorânj mân bunj upap.

⁸ Umņâ buku orotņâ, zo mân buņ upap. Ka Kembangât den sâsâņ, zo buņ upap. Oi den gându nâin nâin sâsâņ, zo buņ upap. Den topņâ nâņgânâņgâņ, zo buņ upap.

⁹ Zo itâgât. Hânân zi ândien, zorat op ko torenņik nâņgâmen. Zorat op ko den sâmen, zo torenņik opmap.

¹⁰ Gâtâm hângât narâkņâ âkâbabân bonņâ muyagei orot mâmenij kwakņâ, zo buņ op naņgâbap.

¹¹ Nâ katep ândiwanân katep den sâwan. Oi katep um yatâ nâņgâm ândiwan. Bet ko lâmbatņâ a opņâ katep nâņgânâņgâņ, zo birâwan.

¹² Narâk ziren kut nâi nâi ikmen, zo tooyân egindâ gâutgâut opmap, zo yatâ. Gâtâm ko bonņâ ek nâņgânat. Narâk ziren torenņik nâņgan. Gâtâm bonņâ ek nâņgâbat. Anutuņâ nek nâņgâmap, zo yatâ ek nâņgâbat.

¹³ Zinziņ kâtik zimbi, zo nâņgâm pâlâtâņ, um bâbalaņ op mambât ândiândiņ sot umņâ gâsâyagom buku orotņâ, zen karâmbut. Buku orotņâ, zo patâziņâ uap.

14

Anutugât den sâm muyamuyagiņ, zorâņâ nep patâ.

¹ Zen umziņandâ gâsâyagom ândibigât kâtigibi. Kaapumņâ nep top top niņgâmap, zo tuunam kâtigibi. Anutugât den sâsâņ nep, zorat nâņgâne zâizâiņ upap.

² Nâi zâk den gându unaknan sâmap, zo a mân dâzângom Anutu dukumap. Zâk Kaapumjâ mam oknanji den gându unaknan sâi a zen kwakme.

³ Ka nâinjâ a denân Kembugât den sâm muyagemapjâ a kâtigibigât betziñan mimbap. Zen um bâbâlanj upigât dâzângomap.

⁴ Nâi zâk den gându unaknan sâmapjâ zik umjâ Kembu sot pâlâtânj op kâtigibapkât sâmap. Ka nâi zâk a kâmut zeñgât mâteziñan Kembugât den muyap sâm muyagemapjâ kâmut ziñ sinji âlibân kâtigibigât sâmap.

⁵ Zen aksik patâ den gându unaknan sâne nânga âlip upap. Ka Anutugât den a denân muyap sâm muyagine nânga âlip nâi upap. A nâi zâk Kembugât den muyabâk sâm muyagemap, zâk den gându unaknan sâmap, zo walâbap. A nâi minduminduyân den gându unaknan sâmjâ melânj a denân dâzângoi âlip upap. Zâk yatâ opjâ Kembugât den muyap dâzângomap, zo yatâ upap. Yesugât kâmut zen Kembugât den nângâm âlip upigât otnigi yatâ san.

⁶ Bukurâp, nâ zeñgâren gam den gându unaknan den sâm dâzângom dap op betziñan mimbat. Nâ Anutugâren gâbâ den nâi mân mem ga muyap dâzângobat, zo dap op betziñan mimbap? Nâ nângânângâ den mo sâm kwâkâziñgâziñgânj den mo Kembugât den nâi mân mem ga dâzângobat, zo dap op betziñan mimbap?

Kembugât den ekapjoot mân sâbi.

⁷ Kut nâi yenjâ kâmam sot uluwet zo kune diñâ muyap mân sâi dap op nângâbi.

8 Mo lâmun waatne kwamitnjâ muyap mân sâi dap opnjâ kâmbamgât kut njâi kubiknjâ âi pâizingâbi?

9 Oi zen yatik gându unakñan den ekapkum sâne a nâmbutnjâ dap op nângâbi? Dinziñâ zo yenñan âibap.

10 Hân dâp a den gându top top zem ariap. Mâirâp ziinjak dinziñâ zo nângâme.

11 A nâinñâ den gându njâi sâi nânga kwakmak upap. Den zorat mariñandâ nâgât nângi kamân njâi gok upap. Oi nâ yatik zâkkât nânga zâk kamân nâin gokñâ upap.

12 Oi zengâren topnjâ yatik ziap. Kaapumgât imbanñâ zengâren muyagibapkât nângâm sâme. Zo âlipñâ. Ka nâ itâ sa nângânek. Zen Kaapumgâren gâbâ imbanñâ mem Yesugât kâmut mem kâtikñan kwatziñgâbigât otziñgi ândibi.

13 Zorat den gându unakñan den sâbapkât imbanñâ zemñangap, zâk den zorat topnjâ nângâm mâburibapkât imbanñâ zorat Kembangâren ninâu sâi bekñan mimbat.

14 Nâ den gându unakñan ninâu sâbat, zo ko um dâpnandâ upap. Oi nângânângânâ zo mân nângâm kubiksa yen zimbap.

15 Zorat nâ dap upat? Itâ upat. Nâ um dâpnandâ ninâu sâbat sot nângânângânandâ nângâm lâunandâ ninâu sâm sapsuga âlip upap. Um dâpnandâ kep mimbat sot nângânângânandâ nângâm simbitkum kep mimbat.

16 Gâ um dâpkandâ den gându unakñanâk Kembangâren sâiwap sâna a kândâtñan gokñâ diñgâ mân nângâmñâ dap op perâkñak sâbat?

17 Gâ sâtâre den bonᶓâ zo sâban. Oi a zorân kwagi dap dap yatâ oi zorânâ tângubap?

18 Zen den gându uᶓakᶓan sâne nâ walâziᶓgâm sâman. Zorat Anutu sâiwap sâm dukuman.

19 Ka nâ itâ sa nâᶓgânek. Den gându uᶓakᶓan sâsâᶓaᶓgât nâᶓga bon oi sâi minduminduyân den gându uᶓakᶓan den kârep patâ sâbâ sâm sâbam. Nâ zorat nâᶓga giap. Ka Kembugâren den memᶓâ minduminduyân muyap sâm muyagigiᶓ, zorat nâᶓga zariap.

Kembugât den âragunam katep tobat mân upi.

20 Bukurâpnâ, den nâᶓgâm kubikkubikᶓaᶓgât nâᶓgânâᶓgâziᶓandâ katep yatâ mân upi. Nâᶓgânâᶓgâziᶓandâ lâmbatlâmbatᶓâ zengât dâp upap. Bâliᶓâ nâᶓgâbi, zo ko umziᶓandâ katep mâik yatâ upap.

21 Mârumᶓan Yuda a ziᶓ um kâtik ândine Kembuᶓâ den ᶓâi itâ sâip. Zen zo Kembugât gurumin den ekabân kulemgune ziap,

“Kembu zâk itâ sap, ‘Nâ hân ᶓâin gokᶓâ sâᶓgonzâᶓgua kâmut zi zengâren gam den gându ᶓâin ᶓâin nâgât den dâzâᶓgone laᶓ mân nâᶓgâbi.’ ”

22 Oi zorat torenᶓâ sâbâ. Gându uᶓakᶓan den sâsâᶓ, zo top lâkulâku ᶓâi uap. Oi zo Yesugât kâmut zengât siᶓgi mân uap. Zo um kâtik zengât siᶓgi. Oi Anutugâren gâbâ den mem muyapᶓâ sâm muyamuyagiᶓ, zo top lâkulâku ᶓâi uap. Zo a um kâtik zengât siᶓgi buᶓâ. Zo Yesugât kâmut zengât siᶓgi.

23 Yesugât kâmut zen aksik mindum aksik gându uñakñan den sâne sâi a yenñâ, a um kâtik zâk zingitñâ sâbe, “Um gulip otziñgap.”

24-25 Um kâtik ziñ zingitñâ sâi zorat nângâne Kembangât top lâkulâku ñâi mân opap. Yesugât kâmut mindumñâ Anutugât den muyap sâm muyagem tatne a yenñâ, um kâtik ñâi zenğâren gam den sâbi, zo nângâbap zo ko aksik umñanğât topñâ sâm muyagine den zo umñan giari umñâ melânğap. Oi umñan kut ñâi ñâi tik zemap, zo muyagei umñâ melânği hânân gei pindiñsâm zem Anutu mâpâsem itâ sâbap, “Anutu zâk perâkñak zen sot ândiap.”

Bet bâsañ mân mindubi.

26 Bukurâp, zorat dap dap? Zen mindunâ sâm um bet bâsañ mân gabi. Ñâi zâk sâtâre kep ñâi mem gâbap. Ñâi zâk kwâkâm zingâziñğâñ den mem gâbap. Ñâi zâk Anutugât den uñakñâ. Ñâi zâk den gându uñakñan sâbâ sâm sâbap. Ñâi zâk den gându uñakñâ zorat top sâsânğ sâbâ sâm sâbap. Zo Kembangât den lañ kârâbapğât upi.

27 Den gându uñakñan den sâna sâm donğbepñâ buñâ, zagât mo karâmbutñâ sâbi. Donğbepñâ mân walâm sâbi. Oi zikñik zikñik sâne a kânokñâ mâburem topñâ sâbap.

28 Ka mâbumâbure a ñâi mân tâi ko mindumin-duyân den gându uñakñan mân sâbi. Ñâi zâk sâbâ sâm zâk zikñik Anutugâren sâbap.

29 Anutugât den muyap sâsânğ, zo a zagâtñâ mo karâmbutñâ sâbi. Oi nâmbutñâ zen den zo nângâm sâlâpkum sâbi.

30 Njai zâk tâi Kaapumŋâ umŋan den pâi sâbam oi a den kândom sâbap, zo birâbap.

31 Anutugât den sâm muyamuyagiŋ zo utnâ sâm upi. A ŋâiŋon sâm naŋgâm ge tâi a ŋâigoot sâm dâzâŋgobap. Sâm mânâŋgât dâzâŋgobi, zorâŋ âlip upap. Oi sâne a nâmbutŋâ ziŋ nâŋgâm umziŋ bâbâlaŋ upap.

32 Anutugât den sâsâŋ a zen Kaapumgât den sânam otziŋgi sâbi. Mân sânam otziŋgi birâbi.

33 Anutu zâk gulipmalipkât Anutuŋâ buŋâ. Zâk lumbenŋan orotŋaŋgât Anutu. Anutu kânok, diŋâ kânok. A kânokŋak pâtârâŋâk sâbap. Ambân zen minduminduyân den hiriŋsâm tapi.

34 Yesugât kâmut kamân dâp zen mindum ambân zen hiriŋsâm tapme. Korinti zen zo yatik utne dâp upap. Ambân zen yatâ opŋâ gigiŋâ ândibigât neŋgât orotŋâ yatâ ziap. Oi zo yatik Kembugât gurumin denân ziap.

35 Ambân zen den ŋâi mâsikâm nâŋgânam mirâziŋan âi arâpziŋ mâsikâziŋgâbi. Ambân ŋâiŋâ minduminduyân den sâi aŋunŋoot upap.

36 Korinti a zen zâizâiŋ upme, zengât sa nâŋgânek. Zen dap nâŋge? Anutugât denŋâ zengâren topkwap muyageip, mo zen ziinik nâŋgâwe?

37 Zengâren gâbâ ŋâiŋâ zikŋaŋgât nâŋgi Propete mo a Kaapumŋoot upap zo ko den kulemgum ziŋgan, zo Kembugât sâtkât kulemguan, yatâ nâŋgâbap.

38 Njai zâk den zi nâŋgi bon mân upap, zo zâkkât nâŋgindâ Anutugât den sâsâŋ a mân upap.

³⁹ Zorat bukurâpnâ itâ sa nângânek. Zen Anu-tugât den muyap sapsusun, zorat kâtigibi. Den gându unakñan sâsân, zorat pâke mân kwapi.

⁴⁰ Minduminduziñan gulipmalip mân op, orotñigâk utnetâ a nâmbutñâ ziñ ziñgitnetâ dâp upap.

15

Yesu zâk mumuñan gâbâ zaatñâ arâpnâ zengâren muyageziñgi.

¹⁻² Bukurâpnâ, siñgi âlip den dâzângua nângâwe. Oi zo mem ândime. Siñgi âlip kwâkâm ziñgâwan, zo yatik mem ândie oi ko âlip kubikziñgâbap. Mo dap nânge? Siñgi âlip dâñ mân mem ândinetâ umziñan bonñâ mân âsageziñgâbap?

³ Zen siñgi âlip nângâm ândibigât dâzângua nângânek. Siñgi âlip nângâwan, zo dâzângowan. Zorat kâukñâ itâ sâm dâzângowan. Kembu Yesu, zâk den siñgi Kembugât ekabân ziap, zorat dâp opñâ bâliñangât suup mem moip.

⁴ Oi Kembugât ekabân den ziap, zorat dâp Yesu hangoitâ zei sirâm karâmbuñan Anutuñâ mângei zaarip.

⁵ Zaatñâ Peterogâren muyageip. Zobâ arâpnâ nâmbutñâ zengâren muyageip.

⁶ Oi Yesugât kâmut tenğânâ 5 tausen walip, zo mindum tatne muyagei igâwe. Zengâren gâbâ donbepñâ tok gwâlâ ândie. Oi nâmbutñâ muwe.

⁷ Oi Yakobogâren muyageip. Oi Aposolo aksik zengâren muyageziñgi igâwe.

8 Paulo nâ zengât tenġâyân mân ândiwan. Iraborâk gâsum sâlâpnogi nep a orâwan. Nâ bet, katep mân kubikaŋgâm âsageip yatâ nâ laŋ nâgâren muyagei egâwan. Aposolo zinjâ kot ninetâ mân dâp uap.

9 Nâ Aposolo nâmbutŋâ zengât ombeziŋan. Nâ Anutugât a ambân kâmut zâŋgom gâwan, zorat Aposolo kot ninetâ mân dâp uap.

10 Nâ Aposolo orâwan, zo Anutuŋâ um lâklâk otnim tânnogi Aposolo op ândian. Oi zâkŋak tânnogi zorâŋâ nâgâren bon buŋ mân oip. Buŋâ. Aposolo nâmbutŋâ zen nep tuune walâziŋgâm sâknam nep tuum kâtigewan. Oi zo Anutuŋâ tânnogip, zorâŋâ mem kâtikŋan kwatnigi sinġi âlipkât nep tuum kâtigeman.

11 Nâ orâwan sot zinj urâwe, zorat mân sâbat. Yesu moip sot zaarip, zorat sinġi sâm den sinġi âlip sâm muyagimen. Oi Korinti a zen yatik mem ândie.

Yesu zâk mumuŋan gâbâ zaaripkât zaatnat.

12 Yesu mumuŋan gâbâ zaarip. Den yatâ sâm dâzânġoindâ wangât zengâren gâbâ nâmbutŋandâ mumuŋan gâbâ zaatzaat, zo mân ziap sâme?

13 Mumuŋan gâbâ zaatzaat, zo kwâimbâmŋâ Yesu mumuŋan gâbâ zaarip, zo kwâimbâbi.

14 Oi Kristo mumuŋan gâbâ mân zaarip sâi ko den sâmen, zo bon buŋ opap. Oi nâŋgâm pâlâtânziŋ zo yatik bon buŋ opap.

15 Oi zorik buŋâ. Nen Anutugât itâ sâwen, “Zâkŋâ Kristo mumuŋan gâbâ mânġei zaarip.” Oi mumuŋan gâbâ zaatzaat mân zei sâi ko Anutuŋâ

Kristo mân mângei zaarip opap. Zorat den sâwen, zo Anutugât den târârak mân sâm sarâ sâbem.

¹⁶ A mumuñan gâbâ zaatzaatñâ mân zei sâi ko Kristo mumuñan gâbâ mân zaarip opap.

¹⁷ Kristo mân zaari sâi nângâm pâlatânziñ yennâ opap. Oi tosaziñ tok zemziñgâbap.

¹⁸ Oi Kristo nângâm pâlatân kwap muwe, zen tâmbetagowe yatâ opap.

¹⁹ Nen hânân narâk ziren Kristo nângâm pâlatân kwâkñanğâmen, zorat bonñâ mârum miwen sot sumbemân mân mimbem sâi ko umbâlâ patâ muyagebap.

Mumuñan gâbâ zaatzaat, zo teñgâyâk zaatnat.

²⁰ Kristo, zâk perâkñak mumuñan gâbâ zaarip. Zâk a mumuñâ kândom otziñgâm zaat ândiap.

²¹ Zo itâgât. A ñâiñâ mumuñâ topkwapniñgip. Zo yatik a ñâiñâ mumuñan gâbâ zaatzaat, zo topkwapniñgip.

²² Nen aksik Adamgât kiurâp opñâ munat. Zo yatik Kristo sot târotâroniñ ziapkât zaat nanğânat.

²³ Oi teñgânñâ sâi ziap, zo yatik zaatnat. Kândom Kristo mumuñan gâbâ zaarip. Oi Kristo âburem takâbap, narâk zoren zâkkât siñgi a nen zaatnat.

²⁴ Âkââkân narâkñan Kristo zâk a kutâ sot zâizâiñ sot imbañâziñoot aksik mem gei kwatziñgâm kembu nepñâ zo Anutugât bikñan pâi narâkñâ âkâbap.

²⁵ Kembu Yesu, zâk kembu nep tuum kâsarâpñâ kiñ gobetñan kâbakñeziñgâm nanğâm nepñâ tuum nanğâbap.

²⁶ Kâsaŋâ boiŋâ tâmbetkubap, zo mumuŋâ. Mumuŋâ zo buŋ upap.

²⁷ Anutuŋâ a sot kut ŋâi ŋâi aksik Kristogât gigiŋâ zâmbarip. Zorat Kembugât ekabân den ŋâi itâ ziap,

“Anutuŋâ a sot kut ŋâi ŋâi aksik mem ge kiŋaŋgât gobetŋan kwatziŋgi mân walâbe yatâ.”

Den zo nâŋgindâ Anutuŋâ nâŋgi Kristogât ombenŋan gigiŋâ upapkât mân sâip.

²⁸ Nannâ zâk a sot kut ŋâi ŋâi nen mem gei kwatniŋgâmŋâ Anutu Ibâŋaŋgât ombenŋan op ândibap. Yatâ oi ko Anutu zikŋak a sot kut ŋâi ŋâi neŋgât kembu patâniŋ op ândibap.

Mumuŋan gâbâ zaatzaat mân zeï sâi ko bâliŋ upem.

²⁹ Korinti a zeŋgâren a nâmbutŋandâ a mumuŋâ zeŋgât op too saŋgonme. Zo mumuŋan gâbâ zaatzaat mân zeï sâi dap dabân yatâ upe?

³⁰ Oi nen ko wangât sâknam kwâkŋan ândiwennâ ândim gen?

³¹ Bukurâpnâ, Zen Kembuniŋâ Yesu Kristo sot pâlâtâŋ op ândie, zorat sâtâre op itâ san. Nâ sirâm dâp mumuŋandâ mâte otnigi ândian.

³² Den sumbuŋâ sa nâŋgânek. Nâ Epeso kamânân zi bâu ulin zen sot agowan. Ka mumuŋan gâbâ zaatzaat mân zeï sâi ko wan bonŋâ membam? Den zo sumbuŋâ san. Mumuŋan gâbâ zaatzaat mân zeï sâi ko itâ sa dâp opap, “Mukan mumat. Zorat mân nâŋgânâŋgâ op itârâŋ sii nalem om nem sâtâre utnâ.” Nâ sa nâŋgânek. Zen yatâ mân nâŋgâbi.

³³ Zen umziŋ mân kâitkubi. Zengâren gâbâ a ŋâi a laŋ ândiândiŋâ zengâren pâlatân upap zo ko orot mâme âlipŋâ zo gulipkubap.

³⁴ Zen umziŋ kubikŋâ ândiândi bâliŋâ birâbi. Zengâren gâbâ a nâmbutŋandâ Anutu kândât kume. Zo nâŋgâm aŋun upigât dâzâŋguan.

Zaatzaat top top zaatnat.

³⁵ Nâmbutŋandâ itâ sâbi? “A mumuŋâ zen dap op zaatpi? Sâkziŋ tobat dap op muyagibi?”

³⁶ Korinti a zen kwakmak a. Zen nebân kut ŋâi kendâme, zo yen mân zaatmap. Keetŋâ zo pane kâmŋâ âlip taki keetŋâ zo alâgem buŋ opmap.

³⁷ Zen keetŋâ kendâme, zo ŋâi. Bonŋâ ko ŋâi. Keetŋik kendâme. Segon mo kut ŋâi kendâne kâmŋâ sot bonŋâ bet takâmap.

³⁸ Oi Anutu zâk nâŋgâm kwâtâtemŋâ sâm pindip, bonŋâ yatik takâmap. Keet dâpŋan bonŋâ tobat ŋâi ŋâi âsagemap.

³⁹ Zo yatik sâkkât topŋâ kânok mân ziap. A neŋgât sunum, zo ŋâi. Bâu zuu zengât sunum, zo ŋâi. Saru zuu zengât sunum, zo ŋâi.

⁴⁰ Oi sumbem a, zen sâkziŋ tobat ŋâi. Hân a, nen sâkniŋ tobat ŋâi. Sumbem a zengât neule, zo ŋâi. A neŋgât neule, zo ŋâi.

⁴¹ Mirâsiŋ, zâk âsakŋâ tobatŋâ ŋâi. Kâin, zâk âsakŋâ tobatŋâ ŋâi. Sâŋgelak, zen âsakziŋâ tobatŋâ ŋâi. Oi sâŋgelak âsakziŋ tobatŋâ kânok buŋâ. Tobatziŋ ŋâi ŋâi zem ariap.

⁴² Mumuŋan gâbâ zaatzaat, zorat topŋâ yatâ. Hân sâk, zo hangubi, zâk buŋ upapkât siŋgi. Zaatpap, zorân mân buŋ upap.

⁴³ Hân sâk hangume, zo bon buñâ. Zo yenñâ. Zaatpap, zo bonñâ sot âsakñâ neulenjoot. Hân sâk hangume, zo lolotñâ. Zaatpap, zo imbanjâjoot.

⁴⁴ Hangugunandâ hân sâk sot. Zaatzaatjandâ sumbem sâk sot. Hân sâk ziap, yatik sumbem sâk ziap.

A sanjinâ Adam sot a unakñâ Kristo.

⁴⁵ Kembugât ekabân den ñai itâ kulemgune ziap,

“A kândom muyageip, Adam, zâk um dâpñoot op zaat ândeip. A bet muyageip, zâk ko Kaapum sot ândiândi mariñâ op ândiap.”

⁴⁶ Sumbemân gâbâ gok, zâk kândom hânân ge mân ândiap. Hânân gokñâ zorâñâ kândom hânân ândeip. Sumbemân gok, zâk bet ge ândeip.

⁴⁷ A kândom muyageip, zâk Anutuñâ hânñâ tuugip, zorat hân a oip. A bet muyageip, zâk sumbemân gokñâ.

⁴⁸ Anutuñâ hân memñâ Adam tuugip. Zâkkât kiurâpñâ nen yatik hânân gokñâ muyageningâningân. Sumbemân gokñâ a ândiap, yatik sumbemgât sinji op ândinat.

⁴⁹ Nen hânân gokñâ tobat urâwen, zo yatik sumbemân gokñâ, zâkkât tobat minat.

Yesunâ taki sumbem sâk minat.

⁵⁰ Bukurâpnâ, den ñai zitâ sa nângânek. Hân sâk zirâñâ Anutu um topñan, sumbemân mân zâi ândibap. Alâalâgij zo zinjzinj kâtikñâ mân zimbap.

⁵¹ Nângânek. Den ñai tik zeip, zo sapsun zinjgâbâ. Nen mân mom nanjindâ Kembu Yesunâ taki tobatniñ ñai op hâukwâtnat.

⁵² Lâmun diŋ sâi kegâk, sinniŋâ kwilitikpamen yatâ, tobat nâi utnat. Lâmun diŋ sâi mumuŋandâ zaatŋâ ândiândi kâtik ândibigât sâkziŋ hâukwapi. Oi gwâlâ ândinatŋâ hâukwap tobat nâi utnat.

⁵³ Sâkŋâ lolot, zinziŋ kâtik buŋ, zi ândiândi kâtik hâmbâ yatâ gwagori geibap. Mumuŋaŋgât siŋiŋâ ândiândi kâtik gwagori geibap.

⁵⁴ Yatâ âsagei ko den itâ kulemgune ziap, zo kâtigibap,

“Kembuŋâ mumuŋaŋgât imbaŋâ koi geip.

⁵⁵ ‘O mumu, gâ imbaŋâgâ ikâ? Mumu, gâ nâŋgobangât imbaŋâgâ ikâ taap?’ ”

⁵⁶ Mumuŋandâ nâŋgobapkât bâliŋandâ imbaŋâ pindâmap. Oi Kembugât gurumin denŋâ bâliŋâ imbaŋâ pindi gwâlanteŋsâmap.

⁵⁷ Ka mumuŋandâ mân kembu otniŋgâm ândibapkât Anutu sâtâre okŋaŋgânat. Anutuŋâ Yesu Kristo sâŋgongoi gem tânnâŋgoi ândiândi kâtik muyagien. Zorat sâm âlip kwâkŋaŋgânat.

⁵⁸ Zorat op ko bukurâp, zen kâtigem kinbi. Âsâbâŋ Kembugât nep tuum kâtigibi. Itâ nâŋgâm tuubi, “Kembugât opŋâ nep tuugindâ bon buŋ mân upap.”

16

Yerusalem zeŋgât siŋgi kât mindubigât sâip.

¹ Kembugât siŋgi a zeŋgât kât mindunam Galata hânân a kâmutŋâ kâmutŋâ dâzâŋgowan. Zo yatik upi.

² Kendon dâp kât tatziŋgap dâp mirin panetâ tâpap. Yatâ op ândine nâ zeŋgâren ga kâtkât diŋâ mân sâm kârubi.

³ Nâ zengâren ga a nângâzingâne âlip oi zo ekap zingâm sângonzângua kât zo mem Yerusalem kamânân âibi.

⁴ Mo nânga âlip oi ninoot ârândân âinat.

Paulo zâk Korinti zengâren âibam narâknâ zingip.

⁵ Nâ Makedonia hânân âi walâm zengâren gâbat. Makedonia hânân narâk kârep mân ândibat. Yen walâbat.

⁶ Korinti zengâren gam tâtat mâme upat motjâi. Zen sot ândia map narâknâ âkâbap. Oi zinjâ mâtâpkât betnan mine zoren mo zoren âibat.

⁷ Nâ narâk ziren yen ga zingit zâmban âibatkat mân otnigap. Zorat Kembujâ nângi âlip oi zengâren gam mâik nâi tâpatkat san.

⁸ Nâ narâk ziren Epeso kamânân ândia Pentekos kendon âkâbap.

⁹ Ziren Kembujâ mâtâp patâ mem pâi nep patâ muyagei ziap. Oi sinji âlipkat a kâsa donjebp ândie.

¹⁰⁻¹¹ Timoteo zâk zengâren gâi buku okjângâne kenjât mân op ândibap. Nâ Kembugât nep tuuman, yatik tuumap. Zorat zâkkât nângâne mân gibap. Mulun galemgum sângongune um lumbe op nâgâren gâbap. Nâ zâk sot buku nâmbutjâ zen ârândân gâbigât mambât ândian.

¹² Bukuninjâ Apolo, zâk bukurâp nâmbutjâ, zen sot zengâren gâbâpkât dukum sângongua mân bâbâlanj oip. Narâk ziren bujâ, narâk nâin mâtâp muyagemjâ zengâren gâbap.

Kembugât den sâsân a hurat kwatzingâbi.

13 Zen galem oraᅅgâm siᅅgi âlip mem kâtigibi. Kenᅅgâtziᅅ buᅅâ kâtigem ândibi.

14 Kut ᅅâi ᅅâi upme, zo umziᅅandâ gâsâyagom upi.

15 Oi bukurâpnâ, den ᅅâi sa nâᅅgânek. Zen Setepano sot kâmut gakârâpnâ, zeᅅgât nâᅅgâme. Zen Grik hânân kândom Kembugât siᅅgi urâwe. Oi zen Kembugât siᅅgi a kore otziᅅgâm ândime.

16 A zo sot a nâmbutᅅâ ziᅅ yatik nep tuume, zen ziᅅgit hurat kwatziᅅgâbi.

17 Setepano, Potunato sot Akaiko, zen nâᅅâren gane umnâ âlip oip. Korinti zen kârebân ândine zen gebâkziᅅan nâᅅâren gam umâlep kwatniwe.

18 Nâ sot Korinti a zen ârândân umâlep kwatniᅅgawe. Zorat zen a yatâ zo zeᅅgât nâᅅgâne âlip upap.

19 Asia hânân Yesugât kâmutᅅâ kâmutᅅâ zen Korinti a zeᅅgât nâᅅgâm ândie. Akwila sot ambinᅅâ Pisisila sot zekât mirin mindume, zen Kembugât opᅅâ sâm sâtâre otziᅅgâme.

20 Bukurâpnâ nâmbutᅅâ, zen yatik sâtâre otziᅅgâme. Zen buku muyageyaᅅgâm luyaᅅgâm upi

21 Paulo, nâ den zi sa bukunâ ᅅâiᅅâ lâunan gâbâ mem ekabân kulemgum ândim gâi zi nâ ninak bitnandâ simbup mem den murukᅅâ zi kulemguan.

22 Nâi zâk Kembugât âkonzigi simᅅât siᅅgi upap.

Kembuniᅅâ Yesu gâ gâban.

23 Kembu Yesugâren gâbâ tânzâᅅgozâᅅgoᅅ zorân zeᅅgâren zimbap.

1 KORINTI 16:24

lvi

1 KORINTI 16:24

24 Nâ Yesu Kristogât op umnandâ
gâsâzângomop.
Zo yatik.

SINGI ÂLIP EKAP
The New Testament in the Komba Language of Papua
New Guinea
Nupela Testamen long tokples Komba long Niugini
copyright © 1980 Wycliffe Bible Translators, Inc.

Language: Komba

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-06

PDF generated using Haiola and XeLaTeX on 28 Dec 2024 from source files dated 31 Aug 2023
8e5b8dff-a54f-5e56-9b8c-1906f06b22d1